

ଆନନ୍ଦସିଂହାରୀ

190/4/06 — 277 ?

বেণু ও বীণা

কবি সত্যেন্দ্রনাথ দত্ত

আর. এইচ. শ্রীমানী এণ্ড সন্স.

২০৪নং কর্ণওয়ালিস ষ্ট্রিট, কলিকাতা ।

বর্ষার নবীন মেঘ এল ধবলীর পূর্নদানে,
 বাজাইল বজ্রভেরী । তে কবি, দিবে না সাড়া তা'রে
 তোমার নবীন ছন্দে ? আজিকার কাজরী গাথা
 ঝুলনের দোলা লাগে ডালে ডালে, পাতায় পাতায় ;
 বয়ে বয়ে এ দোলায় দিত তাল তোমাব যে-বাণী
 বিদ্যুৎ-নাচন গানে, সে আজি লনাটে কর জানি'
 বিধবার বেশে কেন নিঃশব্দে লুটায় বলি-'পরে ?
 আশ্বিনে উৎসব-সাজে শরৎ স্কন্ধর গুল করে
 শেফালির সাজি নিয়ে দেখা দিবে তোমার অঙ্গনে ;
 প্রতি বর্ষে দিত সে-যে শুরুবাতে জ্যোৎস্নার চন্দনে
 হালে তব বরণের ঢীকা ; কবি, আজ হতে সে কি
 বারে বারে আসি' তব শূন্যক্ষে, তোমারে না দেখি'
 উদ্দেশে বরায়ে যাবে শিশির-সিক্ত পুষ্পগুলি
 নীরব-সঙ্গীত তব ছারে ?

জানি তুমি প্রাণ খুলি'

এ স্কন্ধবী ধরলারে পানবোমসিঁছরে : তা'র না'বে
 সাজায়েছ দিনে দিনে নিভা নব সঙ্গীতের গানে ।
 অশ্রায়, অসত্যে ত'র বহু-কিছু অশ্রাণার পাপ
 কুটিল কুৎসিত কুব, তা'র 'পরে তব অভিশাপ
 বসিয়াছ স্নি-প্রবেগে অজ্জনের অগ্নিবাণসম—
 তুমি সত্যবীর, তুমি স্কন্ধঠোর, নিশ্চল, নিশ্চম,
 করুণ, কোমল । তুমি বঙ্গ-ভারতীর তঙ্গী-'পরে
 একটি অপূর্ব তঙ্গ গমেছিলে পবাবার তরে ।

সে-তরুণ চোখে বাঁধা ; আজ হতে বাণীর উৎসবে
তোমার আপন সুর কখনো ধ্বনিবে মন্ত্রববে,
কখনো নগ্নল গুঞ্জরণে । বহুর অঙ্গনতলে
বর্ষা-বসন্তের নৃত্যে যবে ববে উল্লাস উথলে ;
সেখা তুমি একে গেলে বর্ণে বর্ণে বিচিত্র রেখায়
আলিম্পন ; কোকিলের কুহুরবে, শিশীর কে কায়
দিয়েছ সঙ্গীত তব ; কাননের পল্লবে কুম্ভমে
রেখে গেছ আনন্দের তিলোল তোমার । বঙ্গভূমে
যে-তরুণ বাত্রীদল রুদ্ধঘার রাত্রি-অবসানে
নিঃশব্দে বাহির হবে নব জীবনের অভিযানে
নব নব সঙ্কটের পথে পথে, তাহাদের লাগি,
অন্ধকার নিশীথিনী তুমি, কবি, কটাঁইলে জাগি',
জয়মালা বিরচিয়া— রেখে গেলে গানের পাণে
বহিতেছে পূর্ণ কবি' ; অনাগত যুগের সাপে
ছন্দে ছন্দে নানাশব্দে বেঁধে গেলে বন্ধুত্বের জোর,
গতি দিলে চিন্ময় বন্ধনে, ই-তরুণ বন্ধু মোর,
সন্তোর পূজাবি !

আজো যার, জন্মে নাই তব দেশে,
দেখে নাই যাগরা তোমাবে, তুমি তাদের উদ্দেশে
দেখার অতীত রূপে আপনারে ক'রে গেলে দান
দূরকালে । তাহাদের কাছে তুমি নিতা-গাওয়া গান
মৃদুহীন । কিন্তু, ধারা পেয়েছিল প্রত্যক্ষ তোমা
অকৃষ্ণ, তা'রা না' হাবান তা'র সঙ্গান কোথায়,
কোথায় সাধনা ? বন্ধু-মলনের দিনে বাবসার
উৎসব-রসেব পাত্র পূর্ণ তুমি কবেছ আমায়
প্রাণে তব, গানে তব, প্রেমে তব, সোজা, অকায়,
আনন্দের দানে ও গানে । সখা, আজ হতে, হা
গানি মনে, ক্ষণে ক্ষণে চমকি' উঠিবে মোর তিয়া
তুমি আসো নাই ব'লে ; অকস্মাৎ রহিয়া রহিয়া
করণ স্বতির ছায়া রান করি' দিবে সত্যতলে
আলাপ আলোক হাশু প্রসঙ্গ গলীব অক্ষরগণে ।

আজিকে একেলা বসি' শোকের প্রদোষ-অন্ধকারে,
 যত্নতরঙ্গিনীধারা-মুখরিত ভাঙনের ধারে
 তোমাতে শুধাই,—আজি বাধা কি গো স্মৃতির চোখের,
 স্মন্দর কি ধরা দিল অনিন্দিত নন্দন-লোকের
 আলোকে সম্মুখে তব, উদয়-শৈলের তলে আজি
 নবসূর্য্য-বন্দনায় কোথায় হরিলে তব সাধি
 নব চন্দে, নূতন আনন্দগানে ? সে-গানের সুর
 লাগিছে আমার কানে অক্ষসাথে-মিলিত-মধুব
 প্রভাত-আলোকে আজি ; আছে তাহে সমাপ্তির বাধা,
 আছে তাহে নবতন আরম্ভের মঙ্গল-বারতা ;
 আছে তাহে ভৈরবীতে বিদায়ের বিসম্বন্ধ মূর্ছনা,
 আছে ভৈরবের সুরে মিলনের আসন্ন অর্চনা ।

যে-পেয়ান কর্ণধার তোমাতে নিয়েছে সিদ্ধপাবে
 আঘাটের মঙ্গল ছায়ায়, তা'র সাথে বারে বারে
 হযেছে আমার চেনা ; কতবার তারি সারি-গানে
 নিশানন্দ নিদ্রা ভেঙে বাধায় বেঙেঙে মোর প্রাণে
 অজানা পথের ডাক, - সূর্যাস্তপারের স্বর্ণবেথা
 উদ্ভিত করেছে মোরে । পুনঃ আজ তা'র সাথে দেখা
 মেখে-ভরা বৃষ্টির দিনে । সেই মোরে দিল আনি
 ধবে-পড়া কদম্বের কেশর-সুগন্ধি লিপিকানি
 তব শেষ-বিদায়ের : নিয়ে যাব ইচার উত্তর
 নিঃশব্দে কবে আমি, ওই খেয়া-'পরে করি' ভর—
 না জানি সে কোন্ শান্ত নিউলি-ঝরাব গুরুরাতে,
 দক্ষিণের দোলা-লাগা পাখী-জাগা বসন্ত-প্রভাতে ;
 নব মল্লিকার কোন্ আমন্ত্রণ-দিনে ; শ্রাবণের
 ঝিল্লিমন্ত্র-সঘন সঙ্কায় ; মুখরিত প্রাবনেদ
 অশান্ত নিশীথ রাত্রে ; চেম্বের দিনান্ত বেলায়
 কুচেলি-স্বপ্নমতল ?

ধরনীতে প্রাণের খেলায়

সংসারের যাত্রাপথে এসেছি তোমার বহু আগে,
সুখে দুঃখে চলেছি আপন-মনে ; তুমি অন্তরাগে
এসেছিলে আমার পশ্চাতে, বাঁশিখানি লয়ে হাতে,
মুক্ত মনে, দীপ্ত ভেঙ্গে, ভারতীর বরমালা মাথে ।
আজ তুমি গেলে আগে ; ধরিত্রীর রাত্রি আর দিন
তোমা হতে গেল খসি, সর্ব আবরণ করি লীন
চিবস্তন হোলে তুমি, মর্ত্য্য কবি, মুহুর্তের মানে ।
গেলে সেই বিশ্বচিন্তলোক, যেথা সৃগস্তীর বাজে
অনন্তের বীণা; বার শব্দহীন সঙ্গিতধারায়
ছুটেছে রূপের বন্যা গ্রহে সূর্যো তারায় তারায় ।
সেথা তুমি অগ্রজ আমার ; যদি কভু দেখা হয়,
পাব তবে সেথা তব কোন্ অপরূপ পরিচয়
কোন্ ছন্দে, কোন্ রূপে ? যেমনি অপূর্ক হোক নাকো
তব আশা করি, যেন মনের একটি কোণে রাখো
পরবীর পূলিব স্মরণ, লাঞ্জে ভয়ে দুঃখে সুখে
বিজড়িত,—আশা করি, মর্ত্য্যজন্মে ছিল তব মুখে
যে বিনম্র স্নিগ্ধ হাস্য, যে স্বচ্ছ সতেজ সরলতা,
সহজ সত্যের প্রভা, বিরল সংযত শাস্ত্র কথা,
তাই দিয়ে আরবার পাই যেন তব অভ্যর্থনা
অমর্ত্যালোকের দ্বারে,—বাণ্য নাহি হোক এ কামনা ।

(আষাঢ়. ১৩২৯)

—রবীন্দ্রনাথ ঠাকুর

প্রথম সংস্করণের ভূমিকা

‘বেণু ও বীণা’র অধিকাংশ কবিতা এই প্রথম প্রকাশিত হইল। এই কবিতাগুলি ১৩০০ মাল হইতে ১৩১৩ সালের মধ্যে রচিত।

এই গ্রন্থে প্রকাশিত কবিতাগুলির নির্বাচন সম্বন্ধে আমার শ্রদ্ধাম্পদ বন্ধু শ্রীযুক্ত দ্বিজেন্দ্রনারায়ণ বাগ্‌চী এম্-এ, শ্রীযুক্ত যতীন্দ্রমোহন বাগ্‌চী বি-এ এবং শ্রীযুক্ত ধীরেন্দ্রনাথ দত্তের নিকট যথেষ্ট সাহায্য পাইয়াছি। এজন্য আমি তাহাদের নিকট কৃতজ্ঞ।

কলিকাতা ;
১লা আগস্ট, ১৩১৩

শ্রীসত্যেন্দ্রনাথ দত্ত

বিষয়	কবিতার প্রথম লাইন	পৃষ্ঠা
আরম্ভে—	বাতাসে যে বাথা বেতেছিল ভেসে, ভেসে, ...	১
কিশলয়ের জন্মকথা—	চোখ দিয়ে ব'সে আছি, কখন অন্ধুর কাটি' বাতিরিনে প্রথম পলক ;	২
অনিশ্চিতা—	পুলিরে স্কন্দর করি এস তুমি, হে স্কন্দরী ...	৩
আন-গগনের আলো—	আমার কুঞ্জে লতার দুয়ার নিবিড় ছিল না লালা,	৪
নববসন্তে—	ফুলের বনে ফুল কুটোছে, কোকিল গাছে তাগে ;	৫
কাণ্ডনে—	ফুল বলে, 'আঁপি-কলে, ছিছ একা, মিয়মাণ ;	৭
বসন্তে—	পুলক উদার কিরণ রাগে পুলক পাখীর আকুল-গানে ;	৮
রূপ-স্মান—	জ্যেষ্ঠ মাস—বৃষ্টি হ'য়ে গেছে, আচ্ছাদে আকুলা ভাগীরথী ;	৯
মাজলিক—	গরমেশ ! আজি, বরিস তোমার আশিস বৃগল শিরে ;	১০
প্রেম ও পরিণয়—	স্বপ্নে নিলয়—সেই পরিণয়, প্রণয় গাছে দুলি রাগে .	১১
জ্যেষ্ঠস্নানলোকে—	তুমি গো আছি মগন ঘূমে ফুলের বিছানা' ;	১২
স্পর্শগণি—	কহিতে কাহিনী আছে, গাছিবীরও আছে গান ।	১৪
রূপ ও প্রেম—	রূপ ন' তাভব লেখা, প্রেম সে বচনা ;	১৫
মেঘের কাহিনী—	স্বপ্ন হ'লে, জজ্বল দেখে, পুমায় আছিছ ভাই,	১৬
বসায়—	শুণ, পরিণত—কদম কেনব কবিছে ও পাশে ও পাশে .	১৭
সারিকার প্রতি—	সারিকা ! কোথারে আজি --সাগরিকা—কোথা আজি,	২০
আকুল আস্থান—	এস নাথ ! এস নাথ ! এস নাথ !	২১
অবসান—	চলে যাও—ওগো, চলে যাও,—বকুল ফুলেরে দলে বাও ।	২৩
আলোকলতা—	মূল নাই, ফুল ফল পত্র নাই মোর, ...	২৪
উদ্ভাস্ত—	আন বীণা, বাধ তার, ঢাল সুবা গাছ গান ,	২৫
ব্যর্থ—	অতিথি ফিরিয়া গেছে, আয়োজনে এখন কি ফল ?	২৬
ভ্রষ্ট—	আনন্দে অমৃত-গন্ধ আছিল তখন, তীর ছিল দুঃখ অভিমান,	২৭
সাহসুনা—	বিফল যদি হ'য়গো প্রণয়—বিফল হ'তে দাও ;	২৯
একদিন-না-একদিন—	একদিন-না-একদিন, কারো-না-কারো কপালে,	৩০
নৈশ-তর্পণ—	জলের লীলা মিলিয়ে গেল নিবিড় আধারে,	৩৩
মৎস্য-গন্ধা—	দীপে উষা এল কুয়াসার,—কালের মাহুয় চেনা দার,—	৩১
আলেয়া—	পুড়ে মরি—পতি নাছি পাই, কোথা পা'ব জুড়াবার ঠাই ?	৩৪
সহমরণ—	'জিঙ্গাসিছ পোড়া কেন গা' ? অনিবে তা' ?—শোন তুষে মা—	৩৫

বিষয়	কবিতার প্রথম লাইন	পৃষ্ঠা
চিত্রাৰ্ণিতা—	কে তুমি মহিমাময়ী, অয়ি চিত্রাৰ্ণিতা, ...	৩৮
মমতাজ—	হে সুন্দরী, অয়ি মমতাজ ! শোন গো তোমার জয়,	৩৯
বাহুবর (মমি)—	বাহুবরের কবাট পড়ে, মায়াদেবীর টনক নড়ে,	৪০
বক্ষ-মূর্তি—	তা'রি মাঝে, দেখিলাম অপরূপ— ...	৪৩
মমির হস্ত—	কার দেহে, কোন্ কালে, লগ্ন ছিলে তুমি,—	৪৪
ডাক টিকিট—	ডাক টিকিটের রাশি—আমি ভালবাসি, ...	৪৫
উচ্চা—	তিমিরের মগীলেপ নিমিষে যুচায়ে ...	৪৭
স্বর্ণ-গোধা—	স্বর্ণ জিনি বর্ণ তোর, নয়ন-রঞ্জন, ...	৪৮
প্রবাল-দ্বীপ—	তিমিরে, তিমির অস্তি বেথা হয় শিলা, ...	৪৯
আগ্নেয় দ্বীপ—	পাশ্বে তা'রি,—সাগরের গূঢ় তলভূমে,	৫০
মূল ও ফুল—	ফুল—শুধু দেখাঠিতে চায় আপনারে রোদে জোছনায় .	৫১
বড় ও চারাগাছ—	বড় বলে “উড়ে গেল বড় বড় গাছ,—	৫২
জীবন-বল্লাহা—	তিমির মগন গগন ঘিরিয়া একি নব উচ্ছ্বাস !	৫৩
কোন্ দেশে—	কোন্ দেশেতে তরুণতা—সকল দেশের চাহিতে শ্রামল ?	৫৪
সন্ধিক্ষণ—	এতদিনে । এতদিনে বুঝেছে বাঙালি দেহে তার আজো	
	আছে প্রাণ । ...	৫৬
হেমচন্দ্র—	বঙ্গের দুঃখের কথা, সদা করি গান, ...	৬৫
দুর্যোগ—	কি যেন মলিন দমে, কি যেন অলস ধূমে, .	৬৫
বঙ্গজননী—	কে মা তুই বাঘের পিঠে বসে আছিস বিরস মুখে ?	৬৮
স্বর্গাদপি গরীয়সী—	বঙ্গভূমি ! কেন মাগো হইলে উচ্ছ্বাস ?	৬৯
আশার কথা—	জননী গো—আজি ফিরে, জাগিতেছে তব সম্মান সব	
	গঙ্গার উত্তীরে ! ...	৭০
দ্বিতীয় চন্দ্রমা—	স্বপনে দেখিষ্ঠ রাতে, যে ভারত-ভূমি,	৭২
ধর্মঘট—	বাদলরাম হালুগাঠ—গকর গাড়ীর গাড়োয়ান,	৭৩
পথে—	আমার ধলায়—এত যণা ;—আর তুই ধলা মেখে,	
	গাড়ী খান্ পথে দেখে, ধরিলি আমাবে এসে কিনা ।	৭৫
অবগুণ্ঠিতা ভিখারিনী—	ওরে বধু, গ্রাম্য-পথ-শোভা,	
	আজি কেন নগরীর মাঝে ? ...	৭৬
অন্ধ শিশু—	শীর্ণ দেহে, শুষ্ক তা'র মুখে, দৃষ্টিহীন—শিশু এতটুক ;	৭৭
বিকলাঙ্গী—	নগরীর পথে, হায়, কোতুকের স্রোতে, ...	৭৮
কুহানাদপি—	সাগত, স্বাগত, বারাজনা । তুমি কর জীব-উপদেশ ;	৭৯

বিষয়	কবিতার প্রথম সার্ভিস	পৃষ্ঠা
বহুায়—বহুায় গিয়েছে দেশ ভেসে।	...	৮০
দেবীর সিন্দূর—সারা বাত, আহতের মত, শোকাভূত আঁচা ব্যা ভাস্কর,—		৮১
শিশুর স্বপ্নাশ্রু—দোলায় শুয়ে ঘুমায শিশু মায়ের কোলের মত,		৮৩
অক্ষয়—খটের ধারে, বাতাসে ছলছল,	...	৮৪
তুর্দিনে অতিথি—সেদিন হঠাৎ বসে পেয়ে, কামিনী কুল কুটল বনে ;		৮৫
অলিত পল্লব—আহ্লাদে বনানী সাজে মুকুলে পল্লবে, বসন্তের সারঙ্গের রবে।	...	৮৭
গোলাপ—পলে, পলে, আলোকে, পুলকে, ভরি' উঠে গোলাপ উষায় ;		৮৮
কুলাচার—বর এল স্মৃতি-ধুতি-পরা, গৃহে উঠে হাসির ফোয়ারা ;		৮৯
ভিলক দান—রান সারি' সকাল সকাল, মিঠায়ে ভরিয়া ছোট থাল,		৯২
শিশুর আশ্রয়—ননীর গড়ন শিশুটি ; মা তাহার এক বেনিয়ার দাসী,		৯৪
হাসি-চেনা—ওরে দিদি, দে'প, দেখি,— একবার আম,		৯৫
নমৌয়ান্—নগরীর সঙ্কীর্ণ গলিতে—পরিচ্ছন্ন পুরাণ কুটির ;		৯৬
অরণ্যে রোদন—ঘেনেডানি চলে' গেছে জল খেতে নদে,		৯৮
দেবতার স্থান—ভিতারী ঘুমায়েছিল মন্দিরের ছায়ে .		৯৮
মেঘের বারতা—নাল-মেঘপুঞ্জ হ'তে শৈতোর বাবতা		৯৯
অপূর্ব সৃষ্টি—স্বধমে স্থাপিতা হবে সৃষ্টির বিধাতা,		১০০
'বাতাসী-মা'র দেশ—তুলোর মতন পাপ্যব ভরে,		১০১
জীর্ণ পর্ণ—স্বয়ং 'কবন-কার' মাড, দিবা এক 'গবেব কাড .		১০২
অক্ষয়-নট—জন্ম তব দ ভাসুগে, হে অক্ষয়-বট,		১০৩
শিশুহীন পুরী—সালিন-আলয়ে বাড়া শিখা ল'তে আঁজাও রয়েছে কমল-কাল :		১০৪
পথহারা—আকাশ পানে চেয়েছিলাম, ছিলাম করজোড়ে,		১০৫
নাভাজীর স্বপ্ন—'ডোম' বান', ফি-রাহিয়া মুখ চলে' গেল পূজারি ব্রাহ্মণ,		১০৬
'রম্যাণি বীক্ষ্য' - ফাগুন নিশি, গগন-ভরা তারা, ...		১০৭
সন্ধ্যা-তারা—অধি মূহুরোজ্জল তারাটি, মম জীবন-সন্ধ্যা-গগনে .		১০৮
অমৃত-কণ্ঠ—শুনেছি, শুনেছি কণ্ঠ তব, পুনঃ, আজ বহুদিন পরে,		১০৯
নামহীন—বর্ষাশেষ, সূপ্রভাত প্রসন্ন আকাশ,—		১১৫
মমতা ও কমতা—পাশ-শাবকেরে বটে সেহ মেহ করে,—		১১৫
আকাশ-প্রদীপ—অন্ধকাবে জলে ক্ষীণ আকাশ-প্রদীপ, ...		১১৫
শাহারজাদী—কল্পনা-নগরে, শত কবিতা সন্দরী, ...		১১৬
কবি-পরিচয়	—	...

বেণু ও বীণা

“তুমি যে কাব্য সাহিত্যে আপনার পথ কাটিয়া লহতে পারিবে তোমার
এই প্রথম গ্রন্থেই তাহার পরিচয় পাওয়া যায়।”

—রবীন্দ্রনাথ ঠাকুর

“বেণু ও বীণা পাঠ করিয়া অনেক দিনের পর একটু খাঁচি কবিত্ব রস
উপভোগ করিলাম।”

—জ্যোতিপ্রনাথ ঠাকুর

“তোমার ‘বঙ্গজননী’, ‘ঝড় ও চাবাগাছ’ প্রভৃতি কবিতা চমৎকার, —নূতন
শবে অনুপ্রাণিত।”

—স্বদেশচন্দ্র সমাধিগী.

“ভাবে, ভাষায়, মনোভাৱে, ছন্দে, সঙ্গারে, কবির অল্পদৃষ্টিই পার্শ্বের এ গ্রন্থে
পদে পদে।”

“কোন দেশেতে তরুণতা সকল দেশের চাহতে জাগরণ—শীমক পাননি
নোহন, —অমরতা লাভের যোগ্য।”

“কবিতা গুলি পাড়িয়া হৃৎ ও মৃগ হইয়াছি। এই কবিতা এত ভাব সম্পদ,
এত রস ঐশ্বর্য ও এত বিচিত্র সৌন্দর্য লহিয়া অকস্মাৎ প্রকাশিত হইয়া
আমাদিগকে চমৎকৃত করিয়াছেন। এমন স্বাধীন কবিত্ব রস খুব অল্পই উপভোগ
করিয়াছি। ছন্দের লীলা-প্রবাহ, স্বনি—তাহাও সুন্দর।”

—প্রবাসী.



কবি সত্যেন্দ্রনাথ দত্ত

বেণু ও বীণা

আরম্ভে

বাতাসে যে ব্যথা যেতেছিল ভেসে, ভেসে,
যে বেদনা ছিল বনের বুকেরি মাঝে,
সুকানো যা' ছিল অগাধ অতল দেশে,
তারে ভাষা দিতে বেণু সে ফুকরি বাজে !

মূকের স্বপনে মুখর করিতে চায়,
ভিখারী আতুরে দিতে চায় ভালবাসা,
প্লক-প্লাবনে পরাণ ভাসাবে, হায়,
এমনি কামনা—এতখানি তার আশা !

হৃদয়ে যে সুর গুমরি মরিতেছিল,
যে রাগিণী কভু ফুটেনি কণ্ঠে—গানে,
শিহরি, মুরছি,—সেকি আজ ধরা দিল,—
কাঁপিয়া, ছলিয়া, ঝঙ্কারে—বীণাতানে ?

বিপুল স্মৃতির আকুল অশ্রুধারা,—
মর্ম্মতলের মর্ম্মরময়া ভাষা,—
ধ্বনিয়া তুলিবে—স্পন্দনে হ'য়ে হারা,
এমনি কামনা—এতখানি তার আশা !

কতদিন হ'ল বেজেছে ব্যাকুল বেণু,
মানসের জলে বেজেছে বিভোল বীণা,
তারি মুচ্ছ'না—তারি সুর রেণু, রেণু,—
আকাশে বাতাসে ফিরিছে আলয়হীনা !

পরাণ আমার শুনেছে সে মধু বাণী,
ধরিবারে তাই চাহে সে তাহারে গানে,
হে মানসী-দেবী ! হে মোর রাগিনী-রাণী !
সে কি ফুটিবে না 'বেণু ও বীণা'র তানে ?

লয়ের জন্মকথা

চোখ দিয়ে ব'সে আছি, কখন অক্ষুর ফাটি'
 বাহিরিবে প্রথম পল্লব ;
একমনে আছি চেয়ে, ধরা যদি পড়ে তাহে—
 নিখিলের আদি কথা সব ।

সারাদিন ব'সে, ব'সে, তন্দ্রা চোখে এল শেষে ;
 চরাচর ডুবিল তিমিরে ;
প্রভাস্তে দেখিনু জেগে, নয়নে কিরণ লেগে—
 কচি পাতা কাঁপিছে সমীরে ।

আন-গগনের আলো

আমার কুঞ্জে লতার দুয়ার নিবিড় ছিল না ভালো,
তাই কঁাকি দিয়ে পশেছে আজিকে আন-গগনের আলো ;

স্বজনী—শঙ্খ বাজা,—

আজ আসিয়াছে হৃদয়ে আমার, আমার হৃদয়-রাজা !

অরুণ চরণে শরত প্রভাত—

আজি এল যেন তারি সাথে সাথে,

তারি সাথে সাথে নিবাত মলিলে

হুলিয়া উঠিল আলো ;

শুক হিয়ার দু'কূল প্লাবিয়া কিরণে ভরিয়া গেল ।

কুঞ্জভবনে লতার দুয়ারে পল্লবদল নাচে,

অযুত গ্রন্থি তন্তুলতার খুলিলে পরাণ বাঁচে,

উন্মাদ ভালবাসা !

ছিঁড়ে দিলে ভূমি সব বন্ধন, ভূমি কেড়ে নিলে বাসা ।

শরতের আলো—ত্রিলোক জুড়িয়া—

তারি সাথে হিয়া গেল যে উড়িয়া,

বাতাসে চড়িয়া আর কতদূর

ছুটিব তোমার পাছে,

কোথা যেতে চাও, কোথা লয়ে যাও, হায় গো কাহার কাছে ?

আমার কুঞ্জদুয়ারের পাশে ছিন্ন লতিকা গুলি—

ব্যথিতের মত চেয়ে আছে, হের, মাখিয়া ধরার ধূলি ।

ওগো ! সমুদ্র-পাখী,—

তবু চলিয়াছি তোমারি সঙ্গে ব্যগ্র-ব্যাকুল-অঁাখি ।

ভাঙা হৃদয়ের,—ময়ন জলের—

মরু, হৃদ ; কত মরীচি—ছলের ;

হাসির জ্যোৎস্না সূখের লহরে

ঘুম যায় নিরিবিলি ;

বিশ্ব-হিয়ার পরতে পরতে হিয়া মোর গেল মিলি ।

বিশ্বে আলোক ফুটেনি, তখন, ভূমি এসেছিলে যবে,—

অলোক-আলোকে মাতারি কখনো তিমিরে কখনো ডুবে ।

বিশ্ব-ভুবনচারী !—

সৃষ্টি-ছাড়া, কি মন্ত্রের বলে, হৃদয় লইলে কাড়ি !

নিমেঘে ফুটাও নিখিলের ছবি,

নিমেঘে বুঝাও বুঝিবার সবি,

নিমেঘে ছুটাও ছ্যালোকে ভুলোকে

গোহন বংশী রবে ;

সাগিও ছুটেছি, মাতারি আলোকে—আধারে কখনো ডুবে

নব বসন্তে

ফুলের বনে

ফুল ফুটেছে,

কোকিল গাহে তায় ;

কিরণ কোলে

লহর দোলে,

সলিল ব'হে যায় ।

ফুলের বনে

পরাণ মনে

পুলক উথলায় ।

বে গু ও বী গা

নূতন ঋতু,
নূতন প্রীতি,
নিখিল ধরা

নূতন রীতি,
নূতন গীতি,
আপন-হারা

নূতন চোখে চায়,
ফুলের বনে,
সমীর মুরছায় ।

ফুল ফুটেছে,

সোনার মৃগ
সোনার চোখে চায়,
কপোত সনে,
কপোতী গান গায়,
সোনার ফড়িং
ঝিঝির পিছে ধায় ,

মৃগীর পানে

মধুর স্বনে,

ভূগের বনে

নূতন ঋতু,
নূতন প্রীতি,
নিখিল ধরা

নূতন রীতি,
নূতন গীতি,
আপন-হারা

সোনার চোখে চায় !

ফুলের বনে

পরান গনে

পুলক উথলায় ।

বিভোর হ'য়ে

চকোর আজি

চাঁদের পানে চায়,

হৃদয় তলে

প্রেম উথলে

জগৎ ভুলে যায়,

চাঁদ সে ভাসে

নীল আকাশে

আপন জোছনায় ;

বসন্তে

পুলক উষার কিরণ রাগে
পুলক পাখীর আকুল-গানে ;
ফুলের গন্ধে পুলক জাগে,
প্রেমের পুলক কিশোর প্রাণে ।

নৃতন ফুলের গন্ধ উঠে
দিক্ বিদিকে যায়রে লুটে,
চল্ রে ত্বরায়, চল্ রে ছুটে,
চল রে ছুটে ফুলের পানে ।

বাতাস বেয়ে বাতাস ছেয়ে,
ফুলের গন্ধ দিশেহারা—
আকাশ পানে চ'ল্ল ধেয়ে,
যেথায় হাসে উজ্জল তারা ,

আধেক পথে তারার আলো,
ফুলের গন্ধে মিশিয়ে গেল,
বইল ধরায় প্রেমের ধারা,
পুলক ধারা বইল প্রাণে ।

রূপ-জ্ঞান

জ্যৈষ্ঠ মাস—বৃষ্টি হ'য়ে গেছে,
আহ্লাদে আকুলা ভাগীরথী ;
স্নিগ্ধ বাতে ত্রিলোক ভূষিছে,
কৃষ্ণা যেন সেবিছে অতিথি ।

লালে লাল পশ্চিম আকাশ,—
তপ্ত সোনা—সিন্দূরে—হিঙ্গুলে,
অঙ্গে ধরি রক্ত চীনবাস,
জাহ্নবী, চলেছে এলোচূলে !

লাক্ষ্যরাগে রঞ্জিত আকাশে ।
খণ্ড নীল দুর্বাদল-শ্যাম,
প্রলয়ের রক্তে যেন ভাসে
বটের পল্লব অভিরাম,—

দ্রাঘা তার রক্তিম গঙ্গায়,—
দেখ চেয়ে—দিব্য কাম্য-কূপ,
রূপহীনা, কে আছিস্ আয়—
এ বাটে নাহিলে হয় রূপ !

জ্যোৎস্নালোকে

ভূমি গো আছ মগন ঘুমে

ফুলের বিছানা';

জানলা দিয়ে পড়িছে গিয়ে

আকুল জোছনা ।

এই সে ছিল চরণ ছুঁয়ে,

একটি কোণে, একটু নুয়ে,

এখন সে যে হিয়ায় রাজে,

হরিণ-লোচনা ।

সাহস পেয়ে, রয়েছে চেয়ে,

অধীর জোছনা ।

সন্ধ্যা থেকে আমার চোখে

ঘুমের নাহি লেশ ;

জ্যোৎস্নালোকে তোমায় দেখে

স্বপ্নের নাহি শেষ :

আমার ছায়া তোমার বুকে,

জ্যোৎস্না সাথে ঘুমায় স্বপ্নে,

জ্যোৎস্না সাথে নয়ন পাতে

রচিছে মায়ী দেশ ।

সন্ধ্যা থেকে আমার চোখে

ঘুমের নাহি লেশ ।

জ্যোৎস্নাটুকু মিলায়, বায়ু

দোলায় কেশ-পাশ,

এখনি তবে প্রভাত হবে,

জাগিবে রশ্মি-ভাস ।

ঐশ্বর্যমণি

কহিতে কাহিনী আছে, গাহিবারণ আছে গান !
যত দিন মনোবীণে ভালবাসা ভুলে তান !
মলয় চলিয়া গেলে ফুল ত' ফুটে না বনে,
ভালবাসা ফুরাইলে সাদা ত' উঠে না মনে
দেবতা চলিয়া গেলে, দেউলে না দীপ জ্বলে,
ভুলেও না উঠে তান—প্রেম যেথা অবসান ।
ভালবাসা যদি, হায়, বারেক ফিরিয়া চায়,—
অরুণ চরণ দিয়া—হিয়া পরশিয়া যায়,—
ফুটে শত শতদল, ছুটে মধু পরিমল,
জেগে' উঠে কলগীতি—মন প্রাণ কানেকান ।
গেয়ে না ফুরায় গান,—কথা হয় গফুরান ।

রূপ ও প্রেম

রূপ ত' হাতের লেখা, প্রেম সে রচনা ;
রূপহীনা নহে প্রেমহীনা ।
লেখার এ দোষে শুধু, স্পর্শিবেনা কাব্য মধু ?
প্রেম—ব্যর্থ হবে রূপ বিনা ?

কবি হ'তে শ্রেষ্ঠ কি গো কেরাণী মুছরী ?
প্রেম হ'তে রূপের মাধুরী ?
কুরূপে—নয়ন বিনা কেহ ত' করে না ঘৃণা,
প্রেম যা'র হৃদয় যে তা'রি ।

চাঁদের কিরণ সেও চূমে তার গায়,
মলয়া সে কুন্তল দোলায়,
যৌবন-দেবতা করে রাজ্য—সে দেহের' পরে,
মনে প্রাণে বহে প্রেম-বায় !

তবে ফিরায়েনা আঁখি কুরূপ বলিয়া,
যেয়েনা গো চরণে দলিয়া,
নিশির স্নেহের গেহে, দেখো, রূপহীন দেহে,
প্রেমে রূপ উঠে উথলিয়া !

বৈশ্বের কাহিনী

সম্বর হ্রদে, জর্জর দেহে, যুমায়ে আছিনু ভাই,
লবণে জড়িত লহরের কোলে যুমেও স্বস্তি নাই ;
সহসা পূর্বে, তরুণ অরুণ হাসিয়া দিলেন দেখা,
আমি জাগিলাম, বুকে দেখিলাম অরুণ-কিরণ লেখা !

কিরণাস্কুলি ধরি'

আমি, উঠিলাম ছুরা করি',
কম্পিত, ক্ষীণ, জর্জর তনু—ললাটে বহ্নি-শিখা ।

তৃণ পল্লবে, নিম্ন বায়ুতে আপনার জ্বালা ঢালি'
উচ্চ গিরির উন্নত চূড়ে উঠিতে লাগিনু খালি ;
কঠোর শিলার পরশে আমার নখনে ঝরিল জল,
ছল ছল চোখে লাগিনু উঠিতে—ছাইনু গগনতল ।

ডুবিলেন দিননাথ,

হাসি, পবন ধরিল হাত ;
তুম্বারের মত হ'য়ে গেল দেহ, ফুরাল সকল বল ।

* * * * *

বাতাসের মাথে ধরি হাতে হাতে গগনে ছুটিনু কত,
পলে পলে ধরি অভিনয় রূপ --খেলি বাতাসেরি মত ;
চন্দ্রমা আর গ্রহ তারকার সকল বারতা লয়ে—
বরষের পথ মনের আবেগে নিমেষে চলিনু ধয়ে ;

কত যে গেরিনু, আহা,

কড়ু, স্বপনে ভাবিনি গাথা ।

ডাকে মোরে দূর চাতক, ময়ূর, কবি--গান গেয়ে গেয়ে !

বিশ্বের ডাক শুনেছি আবার—হৃদয় ভ'রেছে স্নেহে,
বিশ্বের প্রেমে পরাণ আমার ধরেনা ক্ষুদ্র দেহে ;
বুকে ধরি খর বিজলীর জ্বালা বুকেছি আপনি জ্বলে'
ধরণীর জ্বালা, তাই ত' আবার চলিয়াছি মহীতলে ।

মরুতে যে বায়ু ব'য়—

আর, করিনা তাহারে ভয় ;

রঙীন মেখলা পরিয়া চলেছি আশা দিতে ফুলদলে ।

আমারি মতন কত শত মেঘ জুটেছে আজিকে হেথা,

কাজলের মত বরণ, গাহিছে জীমূত-মন্দ্র-গাথা ।

চলিতে ছুলিছে শত গোস্তুন, পূর্ণ শীতল রসে,

বেদনা তাপিতা আবেশে ঘুমায়, কবরীবন্ধ খসে ;

টুটে কৃতচূড় জটা,

তাহে, ফুটে দামিনীর ছটা,

কুল্লল ভার—আকুল ধরার চোখে মুখে পড়ে এসে ।

ঝঝর রবে ঝরে বারিধার, শিথিলিত কেশ, বেশ ;

গর্জ্জন ধ্বনি সহসা উঠিল ব্যাপিয়া সর্বদেশ ।

এ পারে বজ্র অটু হামিল, ও পারে প্রতিধ্বনি,—

সংজ্ঞা হারা'নু, কি যে হ'ল পরে আর কিছু নাহি জানি ।

জাগিনু যখন শেষ,

দেখি, আছি আমি ব্যাপি' দেশ,

ভূতলে অতলে যেতেছে মিলায়ে আমারি সে তনুখানি ।

আজ নাহি মোর জোছনা সিনান, কিরণে শিঙার নাই,

নাহি রামধনু-মেখলা আমার, নাই কিছু নাই, ভাই ;

আজ আমি শুধু মলিন-বিন্দু, ভাই আজি মোর ধূলি,

চাঁদের মিতালি ভোলা যায়, করি' তার সাথে কোলাকুলি

আমি, নহি নহি মেঘ আর,

এবে, জল আমি পিপাসার,

সার্থক আজি জন্ম আমার—যুথিরে ফুটায়ে তুলি ।

বর্ষায়

শ্রথ, পরিণত— কদম কেশর
ঝরিছে এ পাশে ও পাশে ;
মুছ-বিকশিত কেতকীর রেণু
ক্ষরিছে বাতাসে বাতাসে ।

মেঘ আসে যায় বারেবার,
ঝরে বারিধারা, কদম কেশর,
মিলে মিশে একাকার ।

বহুদিন পরে চলিয়াছি গ্রামে,
নূতন হয়েছে পুরাণো ।
চোখের উপরে বেড়ে ওঠে ধান,—
দায় হ'ল অঁাখি ফিরানো ।

নাচে বুলবুলি আর ফিঙে,
জ্বাল ফেলে ফেলে জেলের ছেলেরা
বেয়ে নিয়ে চলে ডিঙে ।

ধীরে মন্থরে গ্রামের ধরণে
চলেছে গ্রামের লোকেরা,
অলস গমনে জল বহে বধু,
মেঘে মিশে যায় বকেরা ।

কা'রে নাম ধ'রে ডাকে দূরে,
দূর হ'তে তার ফিরে আসে সাড়া
মাঠে মাঠে ঘুরে ঘুরে ।

গাভী সাথে লয়ে একা পথ দিয়ে
 চলেছে চাষার ঝিয়ারী,
 নূতন বয়স, সরস শরীর,
 চাহনি নূতন তাহারি ;
 তা'রে এ দিঠি শিখা'ল কে গো ?
 বয়সের রীতি কে শিখায় নিতি
 এ বিজনে, ব'লে দে গো !

সে যে অপরূপ বরষার মত,—
 আপনি উঠে গো ভরিয়া,
 সে যে সচকিত দামিনীর মত
 প্রাণ আগে লয় হরিয়া ।
 সে যে ধানের ক্ষেতেরি মত,—
 চোখের উপরে বাড়ে পলে পলে
 চেউ উঠে শত শত ।

সাথে গাভী লয়ে পশিল কুটীরে
 কিশোরী চাষার ঝিয়ারী,
 পুলকে অমনি উঠিল ডাকিয়া
 কুকুর—তাহার ছয়ারী !
 হেথা জল নেমে এল হেনে,
 বাদলের ধারা বাদ সাধিল রে
 চিকের পর্দা টেনে !

সারিকার প্রতি

সারিকা । কোথারে আজি—সাগরিকা—কোথা আজ,
অঁকিছে কাহার ছবি, বলিতে কেনলো লাজ ?

সে দিন লুকায়ে রহি,
গেছিলি সকলি কহি,

আজিরে নীরব কেন—বনবীণা বাজ, বাজ ।

আজিও তেমনি কিরে, কদলীর ছায়ে রহি,
তপনের—মদনের—তনু মনে জ্বালা সহি,

শীতল কদলী ছায়
শয়ান রচিয়া হয়,

বিভোরে আছে কি বসি সে আগার পথ চাহি ?

আজো কি আমার ছবি—ফেলিয়া সকল কাজ—
অঁকিছে গোপনে, বালা, মলিন নলিন সাজ ?

আজো কি হৃদয়'পরে—
আমার মুরতি ধরে ?

আজো কি তাহার মনে লীলা করে খাতুরাজ ।

আকুল আহ্বান

এস নাথ ! এস নাথ ! এস নাথ !
বসন্ত প্রভাত ! স্নেহ-বসন্ত প্রভাত !

কোকিল সে কুহু কুহরিল,
শিহরি উঠিল বন-বাত ;
গুঞ্জরি' অলি বাহিরিল
বকুল গন্ধ সাথে সাথে !

এস নাথ ! এস নাথ ! এস নাথ !

বকুল বারিয়া মরিল গো,
চম্পকও হ'ল পরিল্লান ;
মুচ্ছিত তাপে শিরীষ শুচ্ছ,
তনুমন আজি ত্রিয়মাণ ।
'ফটিক জল'— 'ফটিক জল'—
চাতক ফুকারে সবিষাদ ;

আমি লাজভীতে নারি ফুকারণিতে,
এস নাথ ! এস নাথ ! এস নাথ !

নিদ্রিত পুরে বায়ু 'হাহা' করে,
ঘন বরষনে কাটে রাত,
কত যুধি ঝরে—কে গণনা করে ?

হায় নাথ ! হায় নাথ ! হায় নাথ !

কদম কেতকে বনভূমি ছায়,
দাদুরী অঁধারে কাঁদে রে,
ফুল সম হিয়া ফুটিবারে চায়—
তারে কে আজিকে বাঁধে রে !
কেতকী মলিন, নীপ রূপহীন,
কমল খুলিল অঁথি পাত ;
জ্যোৎস্না হাসিল প্লাবিয়া ধরণী ;—
এস নাথ ! এস নাথ ! এস নাথ !

উত্তরে হাওয়া ফিরিল গো,
উল্কা ফুকারে সারারাত ;
ভূমি তো এলে না—তবু, ফিরিলে না,—
হায় নাথ ! হায় নাথ ! হায় নাথ !

কুন্দ কাঁদিয়া ছুখে, হায়,
ঝরিয়া গিশায় কুয়াসায় ;
বিধবা কানন-বল্লরী, মরি,
মলিন আকাশপানে চায় ।
দীর্ঘ যামিনী কাটে না আর,
না মুদে হায় নয়ন-পাত ;
ডাকে তক্ষক—বন-রক্ষক ;
হায় নাথ ! হায় নাথ ! হায় নাথ !

অবসান

চ'লে যাও—ওগো, চ'লে যাও,—

বকুল ফুলেরে দ'লে যাও ।

হেথায় ধূলির মাঝে

কে মুখ লুকা'ল লাজে,—

সে কথা শুনিত্তে কেন চাও ? .

অঁধারে ফুটিয়া সে যে

অঁধারে ঝরিয়া গেছে,

তার কথা—কেন গো স্মধাও ?

তাহার রূপের ভায়

তারি ন' ফুটেনি হয়,

বড় আশা ?—ছিল না ত' তা'ও ।

ঝরিয়া পথেরি ধারে

ছিল সে পড়িয়া, হা—রে

চরণে দলেছ—ভাল—যাও ।

ধূলি-মাথা একাকার,

তার পানে বৃথা আর

আকুল নয়নে কেন চাও ?

তা'রি সে শেষ নিশাস—

এখন' বহে বাতাস ।

হেথা হ'তে—নিঠুর !—পালাও ।

আলোকলতা

মূল নাই, ফুল ফল পত্র নাই মোর,
বাতাসে জনম মম, তরুশিরে বাস ;
তন্তু সম শূক্ষ্ম তনু, স্বর্ণের ডোর,
যে মোরে আশ্রয় দেয় তা'রি সর্বনাশ ।

চিনেছ ? 'আলোকলতা' বলে মোরে লোকে ;
যে মোরে আদরে শিরে ধরে আপনার—
নিস্তার নাহিক তার, বেড়ি পাকে, পাকে,
শ্রীহীন, লাভণ্যহীন, করি তনু তার,—

রস মরে, পত্র ঝরে, শরীর শুকায়,
আত্মহারা আলিঙ্গনে—তরু—এ তনুর,—
সমাচ্ছন্ন পরশের মোহ-মদিরায় ;
প্রতিবাতে কাঁপে দেহ অসার তরুর ।

শুকাইলে বৃক্ষ, আমি, তবে সে শুকাই ;
আলোকের ধন, পুনঃ, আলোকে লুকাই ।

উদ্ভাস্ত

আন বীণা, বাঁধ তার, ঢাল সুরা, গাহ গান ;
যে গিয়েছে—কথা তার, কর আজি অবসান ।

যে ফুল গিয়েছে ঝ'রে, সে আর ফিরিবে নারে,
যে পাখী মরেছে হায়—গিয়েছে সে চিরতরে ;
মোছ তবে অঁখি-ধার—কাঁদিয়া কি হ'বে আর ?
ঢাল সুরা—করি পান, তোল গো নূতন তান,
শ্মশানে জনম যা'র—তা'রো কেন কাঁদে প্রাণ !

আমার এ অঁখি দিয়ে অশ্রু বহে না গো,
এ প্রাণ আপন ব্যথা করেও কহে না গো,
আমার বেদনা বুঝে, এমন পাইনে খুঁজে,
এ জগতে যাতনার—পরিহাস—প্রতিদান !

পাষণে পাষণ হানি' তোল তবে কলতান !

বীণারে তুলিয়া লও, যত দিন আছে তার,—
তোমার ব্যথায় হায় কাঁদিবে সে শতবার,
কণ্ঠে মিলায়ে তান—গাহিবে করুণ গান,
তাহারে ধর গো বুকে—কর শোক অবসান ;
তোল ফিরে কলগান, পাষণে বাঁধিয়া প্রাণ !

ব্যর্থ

অতিথি ফিরিয়া গেছে,
আয়োজনে এখন কি ফল ?
চাতক মরিয়া গেছে,
আজ্জি আর মেঘে কেন জল ;
গোলাপ ঝরিয়া গেছে,
ফিরে যা' রে পবন পাগল ।

টুটিয়াছে সুরার পেয়ালা,
শুষ্ক মাটি লয়েছে শুষ্কিয়া ;
ভেঙেছে ত' ভেঙে যাক্ খেলা,
বরে পরে কি হ'বে দুষ্কিয়া ?
নিশিদিন পঞ্জর-পিঞ্জরে
মরা পাখী কি হ'বে পুষ্কিয়া ?

যামিনী পোহায়ে যদি গেল—
এখন এ বৃথা অঙ্গ-রাগ ;
নয়নের নেশা ত' ফুরা'ল,—
মিছে কেন কথার সোহাগ ?
লিখে লিখে সাদা হ'ল কাল,
ছিঁড়ে ফেল,—চিহ্ন ঘুচে যাক্


দ্রষ্ট

আনন্দে অমৃত-গন্ধ আছিল তখন,
তীব্র ছিল দুঃখ অভিমান,
অনুভূতি তীক্ষ্ণ ছিল, পুষ্প সম মন,
ভালবাসা ছিলনাক' ভাগ ।'

তখনি মে পরিচয় তোমায় আমায়,
কত দিন—কতদিন গেছে ;
এত ঘনিষ্ঠতা,—শেষে, কে জানিত হয়,
অচেনার মত র'ব বেঁচে ?

তুমি ডুবিয়াছ পক্ষে আমি সশঙ্কিত,
মজি নিজে—কখন—কে জানে ;
পাছে এ কাহিনী হয় অন্যের বিদিত,—
ফিরে নাহি চাহি তোমা' পানে ।

হয় ত' হ'তাম সুখী আমরা দু'টিতে,—
হেলা ভরে তুমি পেনে চলি' ;
প্রেম-শতদল হয় ফুটিতে ফুটিতে—
মনে পড়ে ?—গিয়েছিলে দলি' ।



মানুষ পাষণ হয়, কর কি প্রত্যয় ?
 চেয়ে দেখ—সাক্ষী তার আমি ;
 ঠেকিয়া শিখেছি এবে, কেহ কার' নয়,-
 সত্য কি না জানে অন্তর্যামী ।

কেনা, বেচা, বেনেগিরি কানাকড়ি নিয়ে,
 হট্টগোল হাটের মাঝারে ;
 ক্ষয় গেল সোনাটুকু যাচিয়ে, যাচিয়ে,
 প্রতিদিন দোকানে, বাজারে,—

অধরে যে হাসি ছিল—মিশেছে অধরে,
 জঙ্গলের ফুলের মতন ;
 নয়নে যে জ্যোতি ছিল, শুধু অনাদরে,
 নয়নে সে হয়েছে মগন ।

যে দিন পাঠিয়েছিলুম প্রেম-নিমন্ত্রণ—
 অবসর হয়নি তোমার,
 আজ তুমি উজ্জ্বল করেছ গ্রহণ,
 কি অদৃষ্ট তোমার আমার !

ভেব'না যন্ত্রণা দিতে, গঞ্জনা, ধিকারে,
 আজ আমি এসেছি হেথায়,
 আপনার চেয়ে ভালবেসেছিলুম যা'রে—
 তা'র কথা কা'রে কথা যায় ?

বাহিরে, যেথায় তোরে করে পরিহাস—
ক্ষীণ-কণ্ঠে সেথা তুলি হাসি,
অস্তুরে অস্তুরে বাঁধা স্মৃতি-নাগপাশ,
সংগোপনে অশ্রুজলে ভাসি ।

তবুও কাঁদেনা প্রাণ পূর্বের মতন,—
অনুভূতি তীক্ষ্ণ নহে আর,
জেনেছি মৃত্যুর স্বাদ না যেতে জীবন ;
অশ্রুশূন্য শুষ্ক হাহাকার !

সান্ত্বনা

বিফল যদি হয় গো প্রণয়—বিফল হ'তে দাও ;
স্বথের পরে দুঃখ পেলো—আর কি বেশী চাও ?
তোমার মনের আকুলতা
বুঝতে পারে তরুলতা,
মানুষ যদি না বুঝে তা'—সইতে হবে তা'ও ।
প্রেম দিয়েছ প্রেমের ধনী,
দিয়েছ ঋণ—হওনি ঋণী,
রিক্ত তবু মুক্ত তুমি—সেই পুলকেই গাও ।
প্রণয় হারিয়েছিস ব'লে,
পড়িসনে ভাই দুঃখে হেলে,
প্রেমের সঙ্গে প্রাণ যেতে চায়—তারেও যেতে দাও

একদিন-না-একদিন

একদিন-না-একদিন, কারো-না-কারো কপালে,
ঘটেছে যা'—তাই নিয়ে ভাই বৃথাই মাথা বকা'লে

সীতার নামে কলঙ্ক আর লক্ষ্মণেরে অবিশ্বাস,
ধ্যানভঙ্গ শঙ্করের ও যুধিষ্ঠিরের নরকবাস ;
এমন সকল কাণ্ড যখন আগেই গেছে ঘ'টে,
তখন তুমি খ্যাতির খেদে গরম কেন চ'টে ?

চ'লতে গেলেই লাগে ধূলো,

ধুয়ো তখন ও সব গুলো,

তা'ব'লে কি পথ দিয়ে, ভাই, চ'লবে নাক' মোটে ?

একদিন-না-একদিন, কারো-না-কারো কপালে,
ঘটেছে যা' তাই নিয়ে ভাই বৃথাই মাথা বকা'লে ।

অরমিকে রমের কথায় হয়ত' যাবে ভোলা'তে,
অপ্রেমিকে মনের ব্যথায় হয়ত' যাবে গলা'তে ;
অঘটন যা' ঘ'টবে তা'তে—সেটা কিন্তু স্বাভাবিক ।
কাজেই তা'তে বিলাপাদি, বেশী রকম, নহে ঠিক ।

পরকে কেন মন্দ কই ?

মনের মত নিজেই নই ।

আমাদের এই রোষ তুষ্টি—অধিকাংশই আকস্মিক !

একদিন-না-একদিন, কারো-না-কারো কপালে,
ঘটেছে যা' তাই নিয়ে ভাই বৃথাই মাথা বকা'লে

নৈশ-তর্প

জলের লীলা মিলিয়ে গেল নিবিড় অঁধারে,
আলোক মালা উঠল ফুটে নদীর ছ'ধারে ;
নৌকা'পরে আলোক নড়ে,
নদীর জলে রশ্মি পড়ে ;

উঁকি দিয়ে চেউগুলি তায় ছুটেছে কোথা রে ;—
ঝুঝি বা কোন্ ঘুরনি দিয়ে অতল পাথারে ।

পরান আমার কেমন তা'তে হ'ল যে বিকল,
প'ড়ল ঘন নিশাস, চোখেও প'ড়ল এসে জল ।

অমনি ক'রে আমার মনে উঁকি দিয়ে হায়,
কতই গামি-মুখের ছবি নিমেষে লুকায় ;
কেউ বা ভালবেসেছিল,
মধুর মৃদু হেসেছিল,

কার কাছে বা ততটুকুও হয়নিক' আদায়,
কেউ বা গেছে গানে মানে, কেউ ঠেকেছে দায় ।
সবার তরেই আজ্কে আমি হ'য়েছি বিহ্বল ;
উঠছে ঘন নিশাস, চোখেও প'ড়ছে এসে জল ।

কেউ ডুবেছে অতল জলে, ভেসেছে বা কেউ—
ছুটেছে কেউ কুলের পানে মথন ক'রে চেউ ;
কেউ হরষে জলে ভাসে,
কুলের পানে চেয়ে হাসে,

কেউ বা ভাসে চোখের জলে, ত্রাসে মরে কেউ
কূলে ব'সে উদাস মনে কেউ বা গণে চেউ,
আজ্কে আমি সবার তরেই হয়েছি বিহ্বল,
প'ড়ছে ঘন নিশাস, চোখের শুকায় নাক' জল

যে কেউ মোরে ক'রে গেছ স্নেহের অধিকারী,—
নয়ন-জলে জানাব আজ আমি সে সবারি ;

জানিয়ে যাব আরো বেশী,
হয়নি যেথা মেশামেশি,—

ঘটেছিল যেথায় শুধু চোখের লেনা দেনা ।

জানিয়ে দেব চোখের জলে আমি সবার কেনা ।

আমি যে আজ সবার তরেই রেখেছি কেবল,
একটা ঘন নিশাস, চোখের একটি ফোঁটা জল ।

মৎস্য-গন্ধা

দ্বীপে উষা এল কুয়াসায়,—
কোলের মানুষ চেনা দায়,—
চারি ধারে ঘিরি' তা'রে জলের আক্ৰোশ,
বাহিরে রোষের ছায়া—অন্তরে মন্তোষ ।

হিম রাশি ফণা তুলে ধায়,
মৎস্য-গন্ধা তরণী ভাসায় ।

তরী চলে ডুবায়ে মৃগাল.

হাতে তার আর্দ্র কালো জাল ;
দৃঢ় মৃঠি—টানে জাল, পড়েনিরে মীন ।
হ'য়োনা মলিনা বাল্য আজি শুভদিন ;—

জালে ধরা দেছে পরাশর !

তরী'পরে সোনার বাসর ।

কোথা দিয়ে কাটে দিন রাত,
ধাষি নাহি মূদে অঁথি-পাত ;
ধীরে ধীরে মিলাইল—কুয়াসার ঘর,
কাটায়ে মোহের ঘোর উঠে পরাশর ।

মৎস্য-গন্ধা—পদ্ম-গন্ধা আজ,

কোলে তার শিশু 'ব্যাস' করিছে বিরাজ

আলেয়া

“পুড়ে মরি—পতি নাহি পাই,
কোথা পা’ব জুড়াবার ঠাই ?
জ্বালার অবধি মোর নাই ।

দিন রাত শুধু হাহাকার,
শ্বাস-বায়ু অনল আমার,
মৃত্যু হ’ল—গেল না বিকার !

জ্বলে মরি, আকুল জ্বালায়,
ঘুরি তাই বিজনে জলায়,
মোর পিছে— কেন এস, হায় !

ফিরে যাও পথিক, পথিক,
মাড়ায়োনা কখন’ এ দিক্,
এ পথের নাহি কোন’ ঠিক্ ।

ধ্রুব-তারা নহি আমি ভাই,
আলেয়ার পোড়া মুখে ছাই,
পুড়ে মরি—পতি নাহি পাই ।

শীতল হইবে তনু ব’লে—
মাঝে মাঝে ডুবি গিয়া জলে,
উঠিলে দ্বিগুণ পুনঃ জলে ।

মুখ দিয়া উগারি অনল,
পবন ছড়ায় হলাহল,
কর্ণকাল—সকলি বিকল ।

বে পু ও বী গা

আবার যা' ছিল হয় তাই,
শান্তি নাই—যন্ত্রণা সদাই,
পরিণাম হ'ত যদি ছাই ।

ভাবিতাম বেঁচে সুখ নাই,
এবে দেখি মরণেও তাই,
পুড়ে মরি—পতি নাহি পাই ।”

সহযন্ত্রণ

‘জিঞ্জাসিছ পোড়া কেন গা’ ৭
শুনিবে তা’ ?—শোন তবে মা—
দুখের কথা বলব কা’রে বা ।

জন্ম আমার হিঁদুর ঘরে,
বাপের ঘরে, খুব আদরে,
ছিলাম বছর দশ ;
কুলীন পিতা, কুলের গোলে,
ফেলে দিলেন বুড়ার গলে ;
হ’লাম পরের বশ ।
আচারে তার আস্ত হাসি,
—বলব কি আর পরকাশি,—
মিটল সকল সাধ ;—

যে গু ও বীণা

হিঁদুর মেয়ে অনেক ক'রে
শ্রদ্ধা রাখে স্বামীর'পরে,
তা'তেও বিধির বাদ ।

বুড়াকালের অত্যাচারে,—
শব্যশায়ী ক'রলে তা'রে,
জেগেই পোহাই রাত্তি ;
দিন কাটেত' কাটেনা রাত,
মাসেক পরে গেল হঠাৎ,—
নিব্ল জীবন-বাতি ।

কতক দুখে, কতক ভয়ে,
শরীর এল অবশ হ'য়ে
ভাঙল স্ত্রের হাট ;
খ'য়ের রাশি ছড়িয়ে পথে,
চ'লল নিয়ে শবের সাথে,—
যেথায় শ্মশান-ঘাট ।

ওড়িয়ে শাঁখা, সবাই মিলে,
চিতায় মোরে বসিয়ে দিলে,
বাজল শতেক শাঁখ ;
লোকের ভিড়ে ভরেছে ঘাট,
ধোঁয়ায় চিতার আধ্ ভিজা কাঠ,
উঠল গর্জ্জ ঢাক ।

*

রোমে, রোমে, শিরায়, শিরায়,
জ্বালা ধরে,—প্রাণ বাহিরায়,—

মরি বুঝি ধোঁয়ায় এবার !

আচম্বিতে—চীৎকার রোলে—

চিতা ভেঙে পড়িলাম জলে,

মাঝি এক নিল নায়ে তার ।

যত লোক করে 'মার মার',

আমার ত' সংজ্ঞা নাই আর ;

যবে ফিরে মেলিনু নয়ান,

দেখি, এক কুটীরের মাঝে

সেই মাঝি—আছে বসে কাছে,—

যে মোরে জীবন দেছে দান ।

কয়দিন গেল শুধু কাঁদি ;

শেষে তারে করিলাম 'সাদি',

ভুলিলাম ক্রমে যত ক্লেশ ;

আগুনে গিয়েছে জ্ব'লে রূপ,

তবু ভালবাসে পোড়া মুখ,

হুখে হুখে দিন কাটে বেশ ।

*

*

*

খেয়া দেয় মরদ জোয়ান,

আছে আরো দেড় বিঘা ধান ;

আমি নিজেকে মিশি বেচি মা,—

শুনিলেত'—পোড়া কেন গা' !'

চিত্রাঙ্গিতা

১৭

কে তুমি মহিমাময়ী, অয়ি চিত্রাঙ্গিতা,
ধরিয়াছ বীণা-ছাঁদে শিশুরে আপন ?
কচি মুখ খানি তার, চুলে ভরা মাথা,
দেখাইছ স্নেহভরে ; করিয়া গোপন

নিজ মুখ, মাতার উচিত মহিমায় ;
আকর্ষিতে দৃষ্টি শুধু সন্তানের পরে,
নিজরূপ অপ্রকাশ রেখেছ হেলায় ;
জননী তুমিই বটে—বিধাতার বরে ।

দেখা যায় শিরে রক্ত কবরী তোমার,—
প্রবাসে কি পতি তব ? অয়ি মৃদুপানি ।
পাশে যে কুকুর তব—হায়, সে কাহার ?—
কোথা তিনি ?—সেথা কি যায় না ছবিখানি ?

তাই কি, নয়ন-জল করিতে গোপন,—
বসেছ—ফিরায়ে হায় মুখানি আপন ?

মমতাজ

হে সুন্দরী, অয়ি মমতাজ !

শোন গো তোমার জয়,
শোন সৌন্দর্যের জয়,
বিশ্বময় শুধু ওই আজ !

সৌন্দর্য-দেবতা তুমি রাণী !
প্রেমের প্রতিমা তুমি,
তোমার সমাধি-ভূমি—
প্রেমিকের চির মৌন বাণী !

মত্নাটের মমতা-পুতলী !

মোমের রচিত দেহ,
ফুলের রচিত গেহ,—
ছেড়ে তুমি কোথা গেলে চলি' ?

তোমার তনুর অনুরাগে,
দেখগো, পাথর কিবা
পুঞ্জিত ফুলের শোভা
ধরিয়া, তোমাতে ঘিরি' জাগে ।

মত্নাটের রত্নময়ী তাজ !

ইফদেবী শাজাহাঁর,
দেখিলে না একবার—
কি ধনে মণ্ডিত তুমি আজ ?

যাত্নধর

যাত্নধরের কবাট পড়ে,
মায়াদেবীর টনক নড়ে,
যেথায় ছিল যে,—
মায়ার কলে,—নূতন বলে,—
উঠল সে বেঁচে !

মমি

পাশ মোড়া দিয়া, ঢাকন ঠেলিয়া,
জাগিয়া উঠিল 'মমি',
মিশরের যত বুড়া যাত্নধর
দাঁড়া'ল তাহারে নমি' ।

গুঁড়া হ'য়ে পড়ে পুঁথি, বেশবাস,
গুঁড়া হ'য়ে ঝরে চন্দ্র ;
যত চাহি তত মনে বাড়ে ত্রাস,
তত বাহিরায় ঘন্দ্র !

বাম হাতে তা'র কবিতার পুঁথি,
হরিতালে মোড়া মুখ,
নয়ন কোটরে অতল অঁধার ;
ছুরু ছুরু কাঁপে বুক !

অতি ক্ষীণ সুরে, কহিল, সে ধীরে,
সোঙরিয়া 'রমেশেশ',—

“নীল নদ নীরে বন শরবন,
তীরে সে মিশর দেশ ;

আমি সে দেশের রাজার সভায়
ছিলাম প্রধান কবি ;

আজি কেহ নাই বৃষ্টিতে সে বাণী,—
বৃষ্টিতে সে সব ছবি ।

কমলের বন হয়েছে উজাড়,
মৃগালে সে শোভা নাই ;

কালি যেথ চল রাজার প্রাসাদ,—
বি । আজি সে টাই ।

গরেছে হরিণ হ'ল বহুদিন,
ছিল তবু মৃগনাভি ;—

তিলে তিলে ক্ষ'য়ে মোর গাথা সনে
ফুরাইবে—তাই ভাবি ।

আছিল যখন মিশরের দেহে
শক্তি-সতেজ প্রাণ,—

পৃথিবী তখন স্থপতি কলার
পায়নিক' সন্ধান,

স্নায়ু ও শিরায়, যবে, হাতে, পা'য়,
ক্ষীণ হ'য়ে এল বল,—

স্থপতি, ভাস্কর, কবি, চিত্রকর,
বাঁচিতে করিল কল !

বেশু ও বাণী


কূপের সলিল ছড়াইতে মাঠে
শুকায়ে উঠিল কূপ,
পাথরের চাপে মরেছে মানুষ,
পুরী মরু সমরূপ ।

কে দেখিবে ছবি, প্রতিমা, দেউল,
কে শুনিবে আজি গান ?
মরিয়াছে মৃগ ভূষায় পাগল,—
বোঝেনি—মরুর ভাগ ।”

পাশ-মোড়া দিয়া ঢাকনের তলে
ঘুমায়ে পড়িল ‘মমি’,
কে কোথা লুকাল কিছু না বুঝিল
উঠিল যখন নমি’ ।

ধাতুঘরে অন্ধকার ।
ঘোরে কত জানোয়ার ।
ডাকে কত পাখী,
মাছ কিল্ কিল, সাপ হিল্ বিল,
শিলা ঝেলে অঁাখি ।

তা’ সবে এড়ায়ে ছাড়ি হাফ,
তাড়াতাড়ি—একেবারে নেমে পড়ি, গোটা কুড়ি ধাপ ;
‘মায়ার সহিত
আসি উপনীত—’
যেথায় সাজান’ শুধু পাথরের চাপ ।



যক্ষ-যুক্তি

তাঁরি মাঝে, দেখিলাম অপরূপ—
পাষাণে খোদিত, এক মনোরম—মদনের যুগ !
মত্ত যক্ষ-বাজ,
মুরজার লাজ—
ভাঙিতে, যতনে এত, তবু সে বিরূপ !

শিশু-কাম দিতেছে বসনে টান,
কুবের সাধিছে ধরি'—'রতিফল' করিবারে পান ;
বাধা দিয়া তায়—
দ্বিগুণ বাড়ায়,
আগুন জ্বলিলে আর নাহি পরিত্রাণ,

“কথা রাখ—আর ফিরায়েনা মুখ,
এবার—পড়েছ ধরা, স্মখে যে দ্বিগুণ দেখি বুক ।
মুখে শুধু রোষ,
মন পরিতোষ,
কি যে স্বভাবের দোষ—তবু দিবে দুখ ।”

কত যুগ অমনি কেটেছে, হয়,
স্বপ্নিতে বিরতি নাই, তবু মুখ কিভু না ফিরায় ।
তবু, পেতে হাত—
কাটে দিন রাত,
মূলে সে হাবাত হ'লে, কি হ'ত উপায় ৷

কত যুগ অমনি গিয়েছে চ'লে !
ধরিয়া রয়েছে, তবু আনিতে পারনি তারে কোলে ;
আর ভূমি,—পাশে,—
স্বুরিত উল্লাসে,—
স্থির যে র'য়েছে আজো—সে পাষাণী ব'লে ।

মমির হস্ত

(১)

কার দেহে, কোন কালে, লগ্ন ছিলে ভূমি,—
নীলিমা-মণ্ডিত, ক্ষুদ্র, কঙ্কালাগ্র কর ?
তার পর কত গেছে সহস্র বৎসর—
রক্ষা-লেপে লিপ্ত হ'য়ে লভিয়াছ ভূমি ?
কবে সে—কবে সে হয়. গেছে তোরে চুমি',
মানবের সঞ্জীবন তপ্ত ওষ্ঠাধর
শেষ বার ? হয়, কত যুগ-যুগান্তর
আগে, শিশুর আগ্রহ স্পর্শিয়াছ ভূমি
জননী'র বুক ; কত খেলিয়াছ খেলা,—
কত নিধি উৎসাহে ধরিয়া ফেলে দেছ,—
প্রথম যৌবনে কত করিয়াছ লীলা ;
নব রক্তোচ্ছ্বাসে সাজি, কতই খেলেছ—
লয়ে নিজ কেশ, বেশ, নয়ন, অধর
আজ অস্থিসার—তবু মুগ্ধ এ অন্তর !

রাজদণ্ড হয় ত' গো ধরিয়াছ তুমি,
 আজ তুমি কাচ পাত্রে কৌতুক-আগারে !
 আজ গ্রাহ কেহ নাহি করে গো তোমারে,
 দিন ছিল, হয় ত' কৃতার্থ হ'ত তুমি,
 জনমিয়া ছুঁয়েছিলে কোথাকার তুমি,
 আজ তুমি কোথা, হায়, কোন্ দূর দেশে !
 আজ ভালবেসে তোমা' কেহ না পরশে,
 প্রহৃত্তব্জের এবে ক্রীড়নক তুমি,
 ওই তুমি— চিন্তাজ্বর করেছ মোচন,—
 গোপন করেছ হাসি, মুছেছ নয়ন ;
 ওই তুমি—হয় ত' গো করেছ রচন
 ফুলহার,—কারো তরে কুম্ভম শয়ন !
 দেহচ্যুত, অবজ্ঞাত, হায়রে উদাসী,
 ভালবাসা চাহ যদি—আমি ভালবাসি ।

ডাক টিকিট

ডাক টিকিটের রাশি—আমি ভালবাসি,
 যদি তা' পুরাণো হয়—ব্যবহার করা,
 ছেঁড়া, কাটা, ছাপমারা স্বদেশী, বিদেশী ;—
 তা' সবে পরশি' যেন হাতে পাই ধরা !

যুক্তরাজ্য, চিলি, পেরু, ফিজি দ্বীপ হতে,
মিশর, সুদান, চীন, পারস্য, জাপান,
তুর্কী, রুশ, ফ্রান্স, গ্রীস হতে' কত পথে
এসেছে, চড়িয়া তারা কত মত যান !

কেহ আঁকিয়াছে বৃকে—নব সূর্য্যোদয়,
শান্তি দেবী—কারো বৃকে—তুষার পর্বত,
হংস, জেব্রা, বরুণ, শকুনি, সর্পচয়,
কারো বৃকে রাজা, কারো মানব মহত ;—

যুগ্ম হস্তী, যুগ্ম সিংহ, ড্রাগন ভীষণ,
দীপ্ত সূর্য্য, সূর্য্যমুখী, ফিনিক্স, নিশান,
ময়ূর, হরিণ, কপি, বাষ্প জলযান,
দেবদূত, অর্দ্ধচন্দ্র, মুকুট, বিঘাগ ।

কেহ আনিয়াছে বহি' পিরামিড-কণা ।
কেহ বা এসেছে মাখি' পার্থিনন-পুলি ।
নায়েগ্রা-গর্জ্জন বিনা কিছু জানিত না,—
এমন ইহার মধ্যে আছে কতগুলি ।

কেহ বা এনেছে কারো কুশল সংবাদ—
মাখি' মুখামৃত, বহি' সাগ্রহ চুম্বন !
কেহ বা পেতেছে নব বাণিজ্যের ফাঁদ ;
কেহ অনাদৃত, কারো আদৃত জীবন !

সকল গুলিই আমি ভালবাসি, ভাই,
সমগ্র ধরার স্পর্শ পাই এক ঠাই ।

উল্কা

তিমিরের মসীলেপ নিমেষে যুচায়ে
বিশ্বচিত্রপট হ'তে,—পরিষ্কৃত করি'
প্রত্যেক পল্লবে, শাখে, তৃণে, জলাশয়ে,
দেউলে, প্রাসাদে, পথে,—ফুটাইয়া, মরি,

ভুজপাশে বন্ধ সহচরে,— চকিতের মত,
জ্যোৎস্না-খণ্ড-রূপে হায়, চকিতে আবার
কোথায় ডুবিলে উল্কা ? তারা লক্ষ শত
গুদিল নয়ন, হেরি এ দশা তোমার ।

কোথা ছিলে ? কোথা এবে চলিয়াছ, হায়
স্বর্ঘ্যতেজে পুড়িতে কি পড়িতে ভূমিতে ?
অথবা, অনন্ত কাল অভিশপ্ত প্রায়—
অনন্ত অতলে শুধু রহিবে নামিতে ?

ছিলে কি জীবের ধাত্রী পৃথিবীর মত ?
কিন্মা চিরবক্ষ্যা, শুধু, ধ্বংস তোর ব্রত !

স্বর্ণ-গোধা

স্বর্ণ জিনি বর্ণ তোর, নয়ন-রঞ্জন,
স্বর্ণ-গোধা ! ভ্রম হয় স্বর্ণ ময় ব'লে,—
তনু তোর । স্বর্ণ্য কিন্তু তোর পরশন ;
নাহি জানি কালকেতু ভুলিল কি ছলে ।

সেকি তোরে ভেবেছিল খণ্ড স্বর্ণের ?
ত্বরাসিত তাই বুঝি গেছিল কুড়াতে ?
শেষে নিজ ভ্রান্তি বুঝে—মস্মরে পর্ণের—
তীরে বিঁধে এনেছিল অনলে পোড়াতে ।

স্থির তুমি থাক যবে, উজ্জ্বল বরণ !
প্রীতি লভে বিমুক্ত নয়ন ; কিন্তু হায়
অঙ্গভঙ্গী আরস্তিলে—আপন নয়ন
স্বর্ণা ভরে মুদে যায়, ফিরে নাহি চায় ।

জড়মতি রূপসীর অপরূপ হাসি,—
মন হ'তে যেমন মমতা দেয় নাশি ।

প্রবাল-দ্বীপ

তিমিরে, তিমির অস্থি যেথা হয় শিলা,
ছিদ্রময় স্পঞ্জ-পুষ্প যেথায় বিকাশ,
সেই সাগরের তলে, স্নেহে করে বাস—
প্রবাল-দম্পতী এক ;—নিত্য নব লীলা ।

দিনে দিনে প্রবালের বাড়ে পরিবার,
কত জীয়ে, কত মরে—রাখিয়া কঙ্কাল,
পঞ্জরের বাড়ে স্তূপ, যত যায় কাল ;
অজ্ঞাতে পূরণ করে ইচ্ছা বিধাতার ।

স্তূপাকৃত যুগান্তের প্রবাল-পঞ্জর—
কোটি কোটি প্রাণ-পাতে হ'য়ে সংগঠিত,
কোটি হৃদয়ের রক্তে হ'য়ে সুরঞ্জিত,—
একদিন তুলে শির সিন্ধুর উপর ।

পলি পড়ে, শত্রু চরে, জাগে নব দ্বীপ,
ধৈর্যশীল প্রবালের যশের প্রদীপ !

আগ্নেয় দ্বীপ

পার্শ্বে তা'রি,—মাগরের গূঢ় তলভূমে,
আচম্বিতে সমুখিত মহামন্দরব,
আচম্বিতে মাটি ফাটি', পর্বত ভৈরব
তুলে শির ; স্তব্ধ উন্মি ভয়ে তা'রে নমে ।

আগ্নেয় উৎপাতে ত্রস্ত জল-জন্তু-দল,—
কালক্রমে পুনঃ যবে হইল নির্ভয়,—
খামিল কম্পন, দূরে গেল তাপচয়,
দেশান্তের পান্থ পাখী করি' কোলাহল—

উড়ে গেল ;—পড়ে গেল চঞ্চু হ'তে তা'র
বিস্ময়ে—শস্যের শীষ অভিনব দ্বীপে ;
শ্যামল হ'ল সে কালে জীবের আগার,
দাঁড়াইল মৌন মুখে বিধাতা সমীপে ।

একে ধৈর্য্য অলৌকিক ! অন্তে তেজোবল !
তপস্যার প্রতিভার—পরিপূর্ণ ফল ।

মূল ও ফুল

ফুল—শুধু দেখাইতে চায়
আপনারে রৌদ্রে জোছনায় ;
সমীরে করিতে চায় খেলা,
সারা বেলা রঙ্গ করে মেলা ।
অলি বলে দাঁড়া' ওলো যুঁই ।
“এই ছুঁই—এই তোরে ছুঁই ।”
ফুল বলে “তুলেছি হাওয়ায়—
তায় অলি এই বারে আয় ।”
পাতা পরে মাথা যায় ঠুকে
অলি সে পলায় অধোমুখে ।

মূল—শুধু লুকাইতে চায়
অন্ধকারে মাটির তলায় ;
খেলাধুলা গিয়েছে সে ভুলে,
কখন বা দেখে মাথা তুলে ?
কাজ—কাজ—জানে শুধু কাজ,
কাল যথা তেমনি সে আজ ।
মাটি হ'তে শোষে শুধু রস,—
পাতা ফুল রাখে সে সরস,
কাজ সদা—নাহিক কামাই,
ফুলদল—বেঁচে আছে তাই ।

ফুল সে রাজার মত থাকে,
মূল সে চাষীর মত পাকৈ !
মাঝে, শাখা পাতার সমাজ,—
গন্ধ, রস, ভুঞ্জে তিন সঁঝ ।

ফুলহীন মূল কত আছে,
মূলহীন ফুল কই বাঁচে ?
ফুল ঝরে—ফুটে পুনরায়,
মূল গেলে সকলি ফুরায় ।
ফুল তবু উঁচুতেই থাকে !
মূল সে চাষার মত পাঁকে

ঝড় ও চাৰাগাছ

ঝড় বলে “উড়ে গেল বড় বড় গাছ,—
এখনো আছিস্ ? আয়, উপাড়িব তোরে ।”
“থাক্, থাক্” বলে চারা “না-না থাক্ আজ,”
না শুনিয়া কথা, তারে ঝড় ধরে জোরে ।

পাড়ে ভূমি’ পরে আহা ; একি অকস্মাৎ
উঠে চারা, মল্ল সম অক্ষফালি’ পল্লব,—
রক্তবীজ যুবে যেন আপনি সাক্ষাৎ,—
নুয়ে পড়ে ভূঁয়ে, তবু, যুবে অসম্ভব ।

হর্ষে রবি ঢালে শিরে সোনার কিরণ,
শ্রান্তি বিদূরিতে মেঘ হর্ষে ঢালে জল,
রষ্টি জলে রৌদ্রে মিলে—হীরকে হিরণ,
ঝলমল তিন লোক, হাসে পরীদল ।

লজ্জায়, পলায় রড়ে, ঝড় দেশ ছেড়ে,
ত্রিলোকের আশীর্ব্বাদে চারা উঠে বেড়ে ।

জীবন-বন্যা

তিমির মগন গগন খিরিয়া
একি নব উচ্ছ্বাস !
স্পন্দিত করি' লক্ষ তারকা
জাগিছে রশ্মি-ভাস !
বঙ্গমাগরে করি' আজি স্মান
গাহিছে সমীর প্রভাতেরই গান,
জুড়ায় নয়ান, জুড়ায় পরাণ,
হাসরে জগৎ হাস !
ছুটিছে তন্দ্রা, ছুটিছে স্বপন,
ওই শোন শোন কল আলাপন,
উঠিবে অচিরে উজল তপন,
নাহিরে নাহি করাস ।
ঈকি দিয়ে হাসে ত্রিদিব-কন্যা,
বাধ ভেঙে আসে কিরণ-বন্যা,
স্রোতে ফুল পারা ভাসে ডুবে তারা,
নয়ন মেলে আকাশ ।
যুগ যুগ ধরি' তামসীর মাঝে—
নিষ্ফল অঁাখি মেলিয়াছিল যে,
নিশা শেষে দিশা লভিল, সে আজ
লভি' নব আশ্বাস ।
নাহি ভয় আর নাহি শোক চিতে,
নিদ্রার শেষে নব শক্তিতে—
মানবের হাটে ছুটেছে বাঙালী
ধরি' নব অভিলাষ ।

কোথা ডাকে দোয়েল শ্যামা—

ফিঙে গাছে গাছে নাচে ?

কোথায় জলে মরাল চলে—

মরালী তার পাছে পাছে ?

বারুই কোথা বাসা বোনে—

চাতক বারি যাচে রে ?

সে আমাদের বাংলাদেশ,

আমাদেরি বাংলা রে !

কোন ভাষা মরমে পশি—

আকুল করি' তোলে প্রাণ ?

কোথায় গেলে শূন্যে পা'ব—

বাউল সুরে মধুর গান ?

চণ্ডীদাসের—রাম প্রসাদের—

কণ্ঠ কোথায় বাজে রে ?

সে আমাদের বাংলাদেশ,

আমাদেরি বাংলা রে !

কোন দেশের ছুদ্দশায় মোরা—

সবার অধিক পাইরে দুখ ?

কোন দেশের গৌরবের কথায়—

বেড়ে উঠে মোদের বুক ?

মোদের পিতৃপিতামহের—

চরণ-ধূলি কোথা রে ?

সে আমাদের বাংলাদেশ,

আমাদেরি বাংলা রে !

সন্ধিক্ষণ

এতদিনে । এতদিনে বুঝেছে বাঙালী
দেহে তার আজো আছে প্রাণ !
এ জগতে যোগ্য যাঁরা তাঁহাদেরি মাঝে
আমরাও ক'রে নেব স্থান ।
যে খুসী টিট্কারী দিক
অন্তরে বুঝেছি ঠিক—
এ কেবল নহেক হুজুগ ;
সন্ধিক্ষণ আজি বসে, এল নবযুগ !

পথে ঘাটে দেখ চেয়ে অন্তরে বাহিরে
দেশহিতে বিলাস বর্জন,
বিরাট সহস্র শীর্ষ উঠেছে জাগিয়া
লক্ষ মুখে এক দৃঢ় পণ ।
যেথা যে বাঙ্গালী আছে,
প্রাণে প্রাণে মিলিয়াছে,
শুভ লগ্ন পেয়েছে বাঙ্গালী,
মনে হয় আর মোরা রবনা কাঙালী ।
এ বড় আশার দিন—পণ্য স্বদেশের
সবে তুলে লয়েছে মাথায় ;
এবার পরীক্ষা হ'বে প্রতিজ্ঞার বল,
ভগবান্ হউন সহায় ।

ভুলেছিলুম মনুষ্যত্ব
বিলাস ব্যসনে মত্ত,
ভুলেছিলুম পৌরুষের স্বাদ,—
কে জাগালে সে পৌরুষ ?—সিংহের আহ্লাদ !

এ বড় সঙ্কট কাল—পণের রক্ষণ,—
আমাদের ভ্রম পদে পদে,
সতর্ক জাগ্রত যেন রহি সর্বক্ষণ
নাহি ডুবি কলঙ্কের হ্রদে ।
স্মরি স্বদেশের দুখ—
মাতা-পত্নী-কন্যা-মুখ—
নিত্য প্রাতে উচ্চারিব পণ—
“বাঁচাব দেশের শিল্প—দেশের জীবন ।”

দরিদ্র দেশের কোলে দরিদ্রের বেশ
আমাদের সাজিবে সুন্দর,
‘খাটা দেহে খাটো ধুতি’—লজ্জা কিবা তায়
শ্রমের সৌন্দর্য্য মহত্তর ।
শক্তিমান দেহমন,
ভীষ্মের মতন পণ,
তার চেয়ে কি আছে শোভন ?
জুড়ায় পরাণ মন কি ছার নয়ন ?

ভগবান্ ! হীনবলে তুমিই দিয়েছ
এ অপূর্ব নূতন জীবন ।
নইয়া অভয় নাম প্রতিজ্ঞা করেছি ;
শক্তি দাও রাখিব সে পণ ।
নব শ্রোত, বঙ্গভূমে,
তোমার নিদেশে নেমে,
সর্বপ্রাণ করেছে সজীব ;
হে বরদ ! শুভঙ্কর ! হে সুন্দর ! শিব !

তুমি দাও বঝাইয়া নিন্দুকে, কুটিলে,—
‘বাঙালিও জন্মেছে মানব,
কার’ চেয়ে তুচ্ছ নয় বাঙালির দাবী
বৃথা সে করেনা কলরব ;
মঙ্গল বিধান যত,
স্বদেশের সেবা-ব্রত,
আজ সে মাথায় নেবে তুলে ;
মুঢ় সে—যে দাঁড়াইবে তার প্রতিকূলে !’

‘উন্মুক্ত সবারি তরে নিখিল সংসারে
মনুষ্যত্ব-মহত্বের পথ,—
চিরধন্য সে পথে কণ্টক দিতে পারে,—
এমন জন্মেনা দাসখত :
চুক্তির বেতন পাও,—
সর্বমত কাজ দাও :
যে প্রভু অধিক করে আশ
ব’ল’ তারে—কর্মচারী নহে ক্রীতদাস ।’

‘অর্থের সম্বন্ধ হ’তে কত উচ্চতর
মনুষ্যত্ব—দেশহিত-ব্রত :
স্বার্থ সাথে স্বদেশের বিরোধ যেথায়
স্বদেশেরি পায়ে হব নত ।
এ কথা না ভুলে রই—
‘আমি শুধু তুমি নই—
দেশের মাঝারে একজন ;
দেশের—দেশের শুভে কল্যাণ আপন ।’

এমনো পণ্ডিত-মূৰ্খ জন্মেছে এ দেশে,—

শুনিবারে সাহেবের মুখে

নিজের বুদ্ধির কথা ; স্বদেশে বিদেশে

“পণ পণ্ড” বলে স্ফীত বুকে ;

নিজমুখে মাখি কালি,

লভে শূন্য করতালি,—

কালি দিয়া দেশের গৌরবে !

হা বঙ্গ ! দিয়েছ শূন্য ইহাদেরো সবে ।

শুনি' পণপত্রে কত রাজভৃত্য, হায়,

সহি করে অস্পষ্ট অক্ষরে !

কি লজ্জা ! এতই ভয় চাকুরির তরে ?—

কি লভিবে দাস্য রত্তি ক'রে ?

বাণিজ্যে বসেন রমা,

কৃষি প্রায় তারি সমা,

দুই পন্থা উন্মূল্য তোমার ।

তবু বিধা-কৃত-মন ? জঘন্য আচার !

স্বার্থান্ধ স্বদেশদ্রোহী জান নাকি হায়—

জান নাকি আত্মদ্রোহী তুমি ;

পুত্র পৌত্র অন্নাভাবে মরিবে ; এখনো

প্রসারিয়া লও কস্মভূমি ।

কারে কর পরিহাস ?

নিজ স্ত্রীর লজ্জাবাস—

তাও নহে আয়ত-অধীন !

সত্য তুমি অতি দীন—অতি দীন হীন ।

আজি যারা অনাগত—ভবিষ্য যাদের
কি মান তাদের কাছে পাবে ?
কোন স্বত্ব কোন বিত্ত—শ্রুতি ব্যতীত—
তাহাদের তরে রেখে যাবে ?
কোন কৰ্ম, কোন নীতি,
কোন মহত্বের স্মৃতি,—
তাহাদের হবে মূলধন ?
স্মরিয়া তাদের কথা—দৃঢ় কর পণ ।

পাঠশালে ছাত্র করে বিদেশী-বর্জন,
চমৎকার । দৃশ্য চমৎকার ।
বিলাস-বর্জনে হের তরুণী ছাত্রীরা
অগ্রগামী আজি সবাকার ।
বল' রাজপুতানারে,—
বেগী বিসজ্জিতে পারে
বঙ্গনারী তাঁদেরি মতন
অন্তরে সে বীরঙ্গনা, শৌর্যে ভরা মন

শিক্ষক শিখান আজি বালকে যুবকে
হইবারে দেশের সেবক ;
যত ধনী মহাজন পণ-বন্ধ সবে,
উদ্ধ শিখা উৎসাহ পাবক ।
মহাপ্রাণ, সমুদার,
কত শ্লাঘ্য জমীদার
লয়েছেন দেশহিত-ব্রত ;
মুক্তকোষ সবে, প্রাচ্য রাজাদেরি মত ।

আর আজি ধন্য তুমি দরিদ্র বাঙালি,—

দিয়েছ সংশয় বিসর্জন

যেন মন্ত্রবলে তুমি মুক্তহস্ত এবে,

কোথা পেলে এত বড় মন !

পরম্পরে এ প্রত্যয়—

নত্নে আসিবার নয় ;

এ রত্ন দেছেন ভগবান !

অন্তরে সঞ্চিত করি' রাখ দৈবদান ।

বৎসরান্তে ভাদ্রশেষে শুধু একবার

কূল প্লাবি' আসে যে জোয়ার,

তাহার তুলনা নাই ; সমস্ত বৎসরে

সে জোয়ার আসে একবার ।

সে জোয়ার এসেছে রে

আমাদের ঘরে ঘরে,

এসেছে রে নূতন জীবন ।

বাঙালি পেয়েছে আজ সামর্থ্য নূতন ।

কণা কণা স্বর্ণ ছিল স্মৃতিকার মাঝে,

ধূলি পায়া ধূলি মাঝে হারা ;

আজি কোন্ অনির্দিষ্ট ভূগর্ভের তাপে

গ'লে মিলে হ'ল স্বর্ণধারা ।

হার গড়ি সে কাঞ্চনে,

এস সবে, সঘতনে—

পরাইব দেশের গলায় ;

জননী ! জনমভূমি ! সাজাব তোমায়

বাহিরের ঝড় এসে ভাঙে যদি ঘর—

কোথা থাকে পুত্র পরিবার ?

অস্তরে প্রবল হাওয়া উঠিয়াছে যদি

নত হও সম্মুখে তাহার ।

স্বদেশ, তোমার পানে—

দেখগো উদ্বিগ্ন প্রাণে

কাতর নয়নে চেয়ে আছে ।

আশা করে মাতৃভূমি প্রত্যেকেরি কাছে ।

পবিত্র কর্তব্য-ব্রত লয়েছি মস্তকে,

মরেও রাখিতে হবে পণ !

রাজ্যপণে পাশা খেলি', পণরক্ষা হেতু

বনে গেছে হিন্দু রাজগণ ।

বিদেশের মুখ চেয়ে,

শতেক লাঞ্ছনা সয়ে,

সংজ্ঞা যদি এসেছে আবার,—

প্রতিজ্ঞা স্মরিয়া, শীঘ্র লও কার্যভার ।

এদিন অলসে গেলে, কি ক্ষতি যে হবে—

দেখ বুঝে অস্তরে সে কথা ;—

আশা ভঙ্গ, মনঃক্ষোভ, শক্তি অপচয়.

শত দিকে পাবে শত ব্যথা ; —

শত্রু সে পাড়িবে গালি,

ছ'গালে পড়িবে কালি,—

আমল পাবেনা কারো ঠায়ে

আবার সহস্র বর্ষ পড়িবে পিছিয়ে ।

জাতিত্ব গৌরব যাবে অক্ষুরে মরিয়া,
ঝরিবে রে আধ-ফোটা ফুল ;
ভগবান ! রক্ষা কর—শক্তি কর দান,
প্রভু ! মোরা হয়েছি ব্যাকুল !
দুর্বলের বল তুমি !
দীনের শরণ-ভূমি !
আশ্রয় লইনু তব পায়,
লজ্জা-নিবারণ সখা । হও হে সহায় !
কে আছ হে ধনবান আন' স্বর্ণ-ধন,
কায়ক্লেশ আন' শ্রমী য়েবা,
শিল্পী আন' নিপুণতা, উগোগী উগম,
সবে মিলি কর মাতৃ-সেবা ।
পরিশ্রমে নাহি লাজ
আপনি চাষীর কাজ,—
করিতেন রাজা মিথিলায় ।
মন্ত্রদ্রষ্টা ত্রষ্টা ঋষি আদি সূত্রধার !
স্ববেশ রাখাল-বেশ সকলি ভুলিয়া,
মন্য হও স্বদেশের কাজে ;
প্রতিজ্ঞা রাখিয়া স্থির স্থানুর মতন
মান্য হও জগতের মাঝে ।
আত্মতেজে করি' ভর—
কন্মে হও অগ্রসর ।
যুর্থে শুধু বলে এ 'ছজুগ' ;
বঙ্গ-ইতিহাসে হের এল স্বর্ণ-যুগ ।

হেমচন্দ্র

বঙ্গের দুঃখের কথা, সদা করি গান,
দুঃখের জীবন তব হ'ল অবসান,—
হে কবীন্দ্র ! হেমচন্দ্র ! চলে তুমি গেলে,—
সে কি গাহিবারে গান দেবসভাতলে ?
বাসবের সভাতলে কি গাহি'ছ গান ?—
ভারত-ভিক্ষার কথা ? কিম্বা ভিন্নতান,—
গাহি'ছ,—কেমনে বাস করিল পাতালে
দুর্ভুক্ত রত্নের ত্রাসে, বাসব সদলে,
পরাজিত অধোমুখ ; বর্ণিতে তাদের—
গাহিতে গাহিতে হায়—চাহিছ কি ফের
অতি নিম্নে—পরাজিত ভারতের পানে ?
—তোমার সে মাতৃভূমি—সুধা যা'র স্তনে,—
তা'র কথা স্মরি' কি ঝরি'ছে অ'খি-জল ?
জিজ্ঞাসে কি অশ্রু'র কারণ দেবদল ?
কি বলিবে, হায় কবি, কি দিবে উত্তর ?
অন্তর্ধ্যামী জানিছেন তোমার অন্তর ।

দুর্যোগ

কি যেন মলিন ধূমে, কি যেন অলস ঘূমে,
আকাশ রয়েছে ঢাকা সব একাকার ;
ছায়া-শ্রান তরু-শির, প্লাবিত তটিনী-তীর,
বিরাম বিশ্রাম আর নাহি বরষার !

উষার কনক হাসি, আর না জাগায় আসি'
হৃদয়ে উদ্দাম আশা, আনন্দ অপার ;
এখন নিশির শেষে, রুগ্ন বালিকার বেশে—
জীবন জাগায় এসে মরণ সাকার ।

গাপহীন, দাঁপিহীন, এমনি চলেছে দিন ;—
বঙ্গের এ দুর্যোগের নাহি বুঝি শেষ ।
এ জল ফুরাবে না রে, এ আখি শুখাবে না রে ;
ঘুচিবে না বুঝি আর এ মলিন বেশ ।

কত দিন আলো নাই, ভুলে যেন গেছি তাই,
কে বলিবে ছিল কি না ? ... মূকের স্বপন ;
কবে নাকি, স্বর্ণ ছবি, পূর্বে গৌরব রবি
উঠেছিল একবার, হয়গো স্মরণ ।

কিরণ পরশে তার দেশে এল হর্ষভার,
সে দিন প্রথম, বুঝি, সেই দিনই শেষ ;
এসেছিল পথ ভুলে তাই ত্বর গেল চলে,
প্রভাত সে না পোহাতে শূন্য হ'ল দেশ !

প্রিয়জন উপহার— শুকাইলে ফুলহার,—
 তবু কি ফেলিতে তা'রে পারে কোনো জন ?
 গেছে বর্ণ, গন্ধ যত, কর্কশ কাঁটার মত,—
 তবু সে যে প্রিয়-স্মৃতি, যতনের ধন ।

তাই—পূর্ণ অনুরাগে ; আজিও হৃদয়ে জাগে
 সে কাহিনী, মেঘে যেন ক্ষণপ্রভা খেলে ;
 জানি সে বিফল, হয়, নাহি প্রাণ শূন্য কায়,
 আশ্বিনের গুণ কি গো ভস্মে কভু মেলে ?

এল গেল নিশি দিন, মলিন, লাবণ্যহীন,
 এ বরষা ফুরা'লনা, শুকা'লনা জল ;
 আকাশ, পৃথিবী নাই, দাঁড়াবার নাহি ঠাই,
 প্লাবনে হয়েছে এক অকূল অতল !

আমরা ডুবিয়া আছি, মরেছি কি বেঁচে আছি
 জানি না, প্রকৃতি মাগো, ডেকে নে জুড়াই ;
 দক্ষিণ দুয়ার খুলে ডুবাও গো সিন্ধুজলে,
 হয়েছি পরের বোঝা—বরের বালাই ।

সেথা নাহি ভেদাভেদ, নাহি মা মনের ক্রন্দ,
 ঢেকে দে বঙ্গের মুখ, বেঁচে কাজ নাই ;
 অবাধ অনন্ত জল, নাহি তীর, নাহি তল,
 মুক্ত পথে ছুটে যা'ব,—দে না মাগো তাই ।

তা' যদি দিবি না, তবে, দেখাসনি ও বিস্তবে,—
 শরতের শুভ্র হাসি, বসন্ত-বিলাস ;
 যাহারে সাজে, মা, হাসি, তাহারে দেখাস আসি—
 বিচিত্র বরণে অঁকা তোর 'বার মাস' ।

যা'রা জগতের কাছে নতশির হ'য়ে আছে,
 জগতের কোনো কাজে নাহি যা'র যোগ ;
 হৃদয়ে নাহিক বল, জীবনে তা'র কি ফল ?—
 আলোকে পুলকে তা'র শুধু কর্মভোগ ।

দিস্ না, মা, নাহি চাই, আমাদের কাজ নাই—
 হৃদয়-মাতান' তোর নব রবিকর ;
 থাক এই অন্ধকার, মলিনতা বরষার,
 ক্ষুদ্র মোরা, তুচ্ছ মোরা, জগতের পর ।

বরষার নিবিড়তা দিক্‌ প্রাণে আকুলতা,
 আপনা চিনিব তবু, আপনা চাহিয়া ;
 সৌন্দর্য্য নিবিয়া যাক্‌, ধরণী ডুবিয়া থাক্‌,
 আপন দারিদ্র্য শুধু উঠুক ফুটিয়া ।

অন্তহীন অবসাদ, দিক্‌ প্রাণে নব সাধ,—
 যেতে জগতের কাজে উৎসাহ দ্বিগুণ ;
 আয় বরষার ধারা, আয় গো অঁধারি' ধরা,
 কালিমা ঢেলে দে, হৃদে ছেলে দে আগুন !

বঙ্গজননী

কে মা তুই বাঘের পিঠে বসে আছিস্ বিরস মুখে ?
শিরে তোর নাগের ছাতা, কমল-মালা ঘুমায় বুকে ।
ঢল ঢল্ নয়নযুগল জল ভরে পড়্ছে ঢুলে,
কাল মেঘ মিলিয়ে গেল তোর ওই নিবিড় কাল ঢুলে,
শিথিল মূঠি,—ত্রিশূল কেন ধরায় ধূলা আছে চুমি' ?
কে মা তুই কে মা শ্যামা—তুই কি মোদের বঙ্গভূমি ?

মা তোর ক্ষেতের ধান্যরাশি জাহাজ ভ'রে যায় বিদেশে,
অন্ন-সুধা বঙ্গে ফেরে গরল হ'য়ে সর্ব্বনেশে !

বনের কাপাস বনে মিলায়, আমরা দেখি চেয়ে, চেয়ে,
অন্নবসন বিহনে হায়, মরে তোমার ছেলে মেয়ে ।

বল্ মা শ্যামা, সুধাই তোরে, মোদের এ ঘম ভাঙ্বে নাকি ?
শূন্য হ'তে পারবো না মা তোমার মুখের হাসি দেখি ?

ত্রিশূল তুলে নে মা আবার রূপের জ্যোতি পরকাশি,
ভয় ভাবনা ভাসিয়ে দিয়ে হাস আবার তেমনি হাসি !

চরণতলে সপ্ত কোটি সন্তানে তোর মাগেরে—

বাঘেরে তোর জাগিয়ে দে গো, রাগিয়ে দে তোর নাগে রে ;
সোনার কাঠি, রূপার কাঠি,—ছুঁইয়ে আবার দাও গো তুমি,
গৌরবিনী মূর্তি ধর—শ্যামাঙ্গিনী—বঙ্গভূমি ।

‘স্বর্গাদপি গরীয়সী’

বঙ্গভূমি ! কেন মাগো হইলে উর্বরা ?
তাই, মা, নয়ন-বারি ফুরা’ল না তোরা ;
স্বর্গ হ’তে গরীয়সী জন্মভূমি মোর,
এ স্বর্গে দেবতা কই ? দেখা’য়ে দে তুঁরা ।

বল মোরে, কোন হেতু, স্তম্ভ আজি তারা ?
অথবা, মগন কোনো তপস্যায় ঘোর ?
কবে ধ্যান ভাঙিবে গো,—নিশি হ’বে ভোর ?
কবে, মা, ঘুচিবে তোরা নয়নের ধারা ?

অস্তরে বিরেছে, হায়, কল্প-তরুবরে,
দেবতার কামপেন্নু দানবে ছুঁহি’ছে ।
আজি হ’তে অশ্বেষি’ ফিরিব পরে, পরে,
কোথা ইন্দ্র ?—ব’লে দেগো, কাঁদিস্নে মিছে ।

সে যে তোরে অস্থি দিয়ে গ’ড়ে দিবে অসি ;
অয়ি বঙ্গ ! অয়ি স্বর্গ ! অয়ি গরীয়সী !

শ্রাবণ ১৩০০ সাল ।

আশার কথা

জননী গো—আজি ফিরে,—
জাগিতেছে তব সন্তান সব
গঙ্গার উভতীরে !
বাড়িতেছে তব কুটীরে,
ললিত বক্ষ-রুধিরে,
সন্তান কোটি কোটি গো,
দৃঢ় উন্নত শিরে !
আর নহে কেহ অসুখী,
জননীর ভার শিরে আপনার
তুলে নেছে নব-বাসুকি,—
শত সহস্র শিরে ।

উজ্জ্বল হাসি গাননে,
ক্ষেণী বাজিতেছে সিন্ধুর তীরে,
কর্করী বাজে কাননে ;
নব সঙ্গীত গাহিছে,
নূতন তরণী বাহিছে,
পরাণ নূতন চাহিছে,—
বিশ্ব-বিহারী নূতনে !
দধিণে গেছে অগস্ত্য,
পশ্চিমে গেছে ভার্গব, যেথা
সূর্য না জানে অস্ত !

বে শু ও বী ণা

গেছে রঘু প্রাগ্‌জ্যোতিষে,
বিশ্ব ছেয়েছে দলে, দলে, দলে,—
ভিক্ষু, শ্রমণ, বোধীশে ;—
দীপ্তি বহি' তিমিরে !

ধনপতি মে শ্রীমন্ত,—
সিংহল-জয়ী বিজয় সিংহ,—
কীর্ত্তি-কথা অনন্ত !
জ্ঞানে, বিজ্ঞানে সিদ্ধ,
বীর্যে—উদার, স্নিগ্ধ,
আচারে জগৎ মুগ্ধ,
সেবায় নহেক' ক্লান্ত ;—
হেন সন্তান, আজ,
আইল কি পুনঃ আলয়ে তোমার,—
ঘুচাইতে দুখ, লাজ ?
তোমারি মন্ত্র-ভাষা গো,—
পৃথ, স্থললিত, সঙ্গীত জিনি'
অন্তর-পরকাশা গো ;—
জাগিছে আজি সে ফিরে ।

সপ্ত সাগর তীরে,—
তোমার সপ্ত কোটি সন্তান
শত কোটি হ'বে ধীরে !
(মোরা) নৌকা ভরেছি পণ্যে,
(তুমি) আশিষ' দুর্বা-ধান্যে,

জননী ! তোমারি পুণ্য—
(মোরা) সকলি পাইব ফিরে ।
নৌকা—ছুটেছে অধীরে !

সাত ডিঙা ধন কোন্ প্রয়োজন ?
ঘিরিয়া ফেলিব মহীরে ;
অচিরে—কিন্মা ধীরে !

দ্বিতীয় চন্দ্রমা

স্বপনে দেখিনু রাতে, হে ভারত-ভূমি,
সাগর-বেষ্টিতা অয়ি মর্ত্যের চন্দ্রমা
কুহকী নিদ্রার বশে সংজ্ঞাহীন আমি,—
শুনিনু মহিমা তব অয়ি বিশ্বরমা ।

দেখিলাম, মহাকুম্ম সাগরের তলে,
বলিছেন মন্দ্রভাষে নাগদলে ডাকি',
“খুলে দে বন্ধন যত, শিরে ধর তুলে,
অপূর্ব এ ভূমি, আয় দেবলোকে রাখি !

পৃথিবীর গন্ধ নাই—নিষ্কাম ভারত ।
ধর্মের ভবন চির ' দেবযোগ্য দেশ ।
ধন্য-বিভা পৃথিবীরে দিয়েছ নিয়ত,
এবে চন্দ্র সনে প্রভা বিতর অশেষ ।”

সহসা দেখিনু, মুক্ত কপোতের মত
উঠিলে অশ্বরে, ভূমি, দ্বিতীয় চন্দ্রমা !
চির জ্যোৎস্না হ'ল ধরা, চির আলোকিত
অতন্দ্র যুগল-চন্দ্র—অপূর্ব সুষমা ।

ধর্মঘট

বাদল রাম হাল্‌ওয়াই—
গরুর গাড়ীর গাড়োয়ান,
ধর্মঘটের মস্ত চাঁই
দেখতেও ঠিক পালোয়ান ।
মোটা রকম বুদ্ধিটা, তার
গলার স্বরও মধুর নয়,
কিন্তু যে কাজ করবে স্বীকার,—
করবে সে তা স্‌নিশ্চয় ।
ছ' ছ' দিনের ধর্মঘটে
বিকিয়েছে সর্বস্ব তার,
অন্ন মোটে আর না জোটে
তবুও কাজে যায়নি আর ।
হোথায় যত সওদাগরে
কামড়ে মরে নিজের হাত,
হেথায় সে মগোষ্ঠী শুকায়
নাইক পয়সা, নাইক ভাত ।
হুপ্তা গেল ; পত্নী তাহার
ছ'দিন আছে উপবাসে,
যুত্‌তে গাড়ী ব'লতে গিয়ে,
শিক্ষা ভালই পেয়েছে সে ।
শিশুটি তার কাণ্ড দেখে
কাঁদতে যেন গেছে ডুলে,

পথে

আমার ধূলায়—এত ঘৃণা ;—
আর তুই ধূলামেথে, গাড়ী খান্ পথে দেখে,
ধরিলি আমারে এসে কিনা !
আশ্রয় লইলি মোর কোলে,
ওরে, তোর নাহি ভয়, ভয়ের এ ঠাই নয়,
ধূলা দেছ,—মারিব তা' ব'লে ?
শোন্ ওরে পথের বালক,
দূরে চলে গেছে গাড়ী, এই বেলা তাড়াতাড়ি
বাড়ী না' রে, থাকিতে আলোক ।
চলে গেছে, যাক্—বাঁচা গেল ;
আশ্রয় দিলাম ওরে, সে মোর ধূতির 'পরে—
চিহ্ন এক রেখে গেল কাল ।
সত্য কথা বলিতে কি ভাই,
ধূলা দেখে হ'ল রোষ ; কিন্তু তা'র—কিবা দোষ ?
পথই তা'র খেলিবার ঠাই ।
দরিদ্রের শিশু সে যে হয়,
কোথায় আঙিনা তা'র নাচিবার—খেলিবার ?
পথে খেলে, ধূলা মাখি' গায় ।
বিশ্বগ্রামী, ওগো, ধনিদল ।
দরিদ্রের সকলি ত'— করিয়াছ কবলিত,
পথ মাত্র আছিল সম্বল,—

বে গু ও বী পা

ছেলেদের খেলিবার স্থান ;
তা'ও সহিল না আর, তা'ও কর অধিকার ?
গাড়ী, ঘোড়া, আনি নানা যান !

বিভীষিকা দেখায়ে এ সব—
ইচ্ছা কি দরিদ্রদলে, পাঠাইতে রসাতলে ?—
ধনহীন—নহে কি মানব ?

অবগুণ্ঠিতা ভিখারিণী

ওরে বধু, গ্রাম্য-পথ-শোভা,
আজি কেন নগরীর মাঝে ?
কুমকের গৃহলক্ষ্মী তুই, .
বল আজি হেথা কোন্ কাজে ?
তুই কি বিধবা নিরাশ্রয়া ?
স্বামী'র স্মিরিত্তি, শিশুটির
বাঁচাইতে, ত্যজি' লজ্জা ভয়
এসেছিস্ গ্রামের বাহিরে ?
অথবা এ কি রে অভাগিনী
কলঙ্কের নিশানা তোমার ?
—ভেবেছিলে বালাই যাহারে,
সাস্তুনা সে আজি নিরাশার ।
কেন বাছা এনেছিস্ শিশুরে ভিক্ষায় ?—
কাঁদে ছেলে,—নিয়ে যা',—নিয়ে যা' ;—
জান না ?—ভিক্ষায় তুমি এনেছ যাহারে,
পিতা তা'র নিখিলের রাজা !

অন্ধ শিশু

শীর্ণ দেহ, শুষ্ক তা'র মুখ,
দৃষ্টিহীন—শিশু এতটুকু ;
জন্মেছে সে ভিখারীর ঘরে,
জীবন বহিছে অনাদরে ।

পিতা মাতা কেহ নাই— কেহ নাই তা'র,
সে এখন অপরের সহায় ভিক্ষার ।

অন্ধের দুখের নাহি শেষ,

গ্রীষ্মে শীতে একই তা'র বেশ,—

একই ভাবে সকাল বিকাল,

পথে বসি' কাটায় সে কাল ;

কেহ বা দলিয়া যায়,—কেহ বলে 'আহা',

ব্যথিতের দুঃখ, হায়, কে বুঝিবে তাহা !

না জেনে সে বসিল ফিরিয়া,

পথ পানে পিছন করিয়া ;—

না জেনে প্রাচীর-পাদ-মূলে,

হাতখানি পাতিল সে ভুলে !

নিষ্ঠুর নগরী ওরে, বিক্রমের ছলে,

মনে হয়, বিধি তোরে ভৎসিলা কৌশলে ।

বিকলাঙ্গী

নগরীর পথে, হায়,
কৌতুকের শ্রোতে,
পাতিয়া বিশীর্ণ হাত—
প্রাতঃকাল হ'তে,
বসে' আছে পথে !

মুখে নাহি বাণী, গা'য়
ছিন্ন বাস খানি,
বয়স চৌদ্দের বেশী
নহে অনুমানি,
কুজা অভাগিনী ।

মুখ পানে তবু, কা'র
চাহেনাক' কভু,
যৌবন যদিও আজি
দেহে তা'র প্রভু,—
চাহেনাক' তবু !

সরম-সকোচে, তা'র
সর্ব দোষ ঘোচে ;
কুজারে ঘিরিয়া, ফুল—
ফোটে গোছে গোছে !
সরমে—সকোচে ।

‘কুছানাঙ্গি’

স্বাগত, স্বাগত, বারান্ধনা
তুমি কর ভাব-উপদেশ ;
সোনা সে সকল ঠাই সোনা,
যাই হ'ক পাত্র, কাল, দেশ ।

পাঁড়া পেলে পথের কুকুর,
হও তুমি কাঁদিয়া বিব্রত :—
ব্যথা তা'র করিবারে দূর,
প্রাণ ঢেলে সেবিছ নিয়ত !

উঠিছে সে শ্মসিয়া, শ্মসিয়া,
উর্দ্ধমুখ উদগত নয়ন ;
শ্মসিয়া—শ্মসিয়া পড়ে হিয়া—
তোমারো যে তাহারি মতন ।

হাসে লোক কান্না তো'র দেখে,
ক্ষুণ্ণ-দৃষ্টি—উত্তর তাহার !
এত দিন কিমে ছিল ঢেকে—
এ হৃদয়—উৎস মমতার ?

দেখি' তো'র ভাব আজিকার—
অনন্দাশ্রু এল চক্ষু ভরে,
বুদ্ধ তুমি—ঐশট-অবতার,—
দিনেকের—ক্ষণেকের তরে !

বন্যায়

বন্যায় গিয়েছে দেশ ভেসে ।

বনস্পতি,—পাখীদলে, নিশীথে, জাগায়ে বলে ;—
“প্রাণ বাঁচা’—পালা’ অন্য দেশে ।

রক্ষা নাই আমার এবার,
এবার আসিলে হানা, আর আমি টিকিব না,
দেরি তোরা করিসনে আর ।”

দেখিতে দেখিতে এল হানা,
বনস্পতি,—গঙ্গাজলে, ছিন্ন মূল,—ভেসে চলে,
তবু তা’রে পাখীরা ছাড়ে না ।

“এখন’ যা” বলে বনস্পতি ;
পাখী বলে “পুণ্য ম’লে— ভেসেছি গঙ্গার জলে” ;
স্বজনের এই ত’ পীরিতি ।

দেবীর সিন্দূর

সারা রাত, আহতের মত,
শোকাহত আচার্য্য ভাস্কর,—
নিদ্রাগত—শয্যা বিলুপ্তিত,
তবু ব্যথা জাগে নিরন্তর ।

অকস্মাৎ আসিল চেতন,
বক্ষ হ'তে নামেনি বেদনা ;
ধাম যেন পূর্বের মতন
সহজে করে না আনাগোনা ।

“আজি দেশে দেবী-মহোৎসব,
গরে ঘরে বাগ বাজে নানা :
সধবারা সাজিতেছে সব,
বিধবা লীলার তাহে মানা ।

আছে লীলা বীজাক্ষ চর্চায়,
মন যেন শান্তির নিবাস ;
সে ধৈর্য্য জানি না কেন, হয়,
মোর মনে জাগায় তরাস ।

মূর্ত্তিমতী শান্তি, মা আমার,
কোনো কথা নাহি তাঁর মুখে ;
তবু, তাঁর মুখ-চাওয়া ভার,
শেল সম বাজে মোর বুকে ।

বে গু ও বা ণা

লীলাবতী—সন্ন্যাসিনী বেশে—
করিতেছে দীর্ঘ উপবাস ;
পিতা আমি, দেখিতেছি ব'সে,
চোখের উপরে বারমাস !

ডাকি' লহ মোরে সমরাজ !
ডাকি' লহ কন্যা পতিহীনা ;
পিতা হ'য়ে করিতেছি আজ,
সন্তানের মরণ কামনা !

আজি দেশে দেবী-মহোৎসব,—
এ উৎসব সকল হিন্দুর ;
সধবারা, চলিয়াছে সব,
পরিবারে দেবীর সিন্দূর :—

ব্রাহ্মণী ! এদিকে এস, শোন,
এখনি করিয়া দাও দূর—
মুর্থ—যত দেবল ব্রাহ্মণ,
পর' নাক' দেবীর সিন্দূর ।”

শিশুর স্বপ্নাশ্রু

দোলায় শুয়ে ঘুমায় শিশু মায়ের কোলের মত,
মায়ের নয়ন নিয়েছে আজ জাগরণের ব্রত !
পল বিপলে, সকাল সাঁঝে, পাঁচটি মাসের স্নেহ,
হৃদয়টি তা'র ছাপিয়ে দিয়ে ভাসিয়ে দেছে গেহ ।
হায় কিশোরী ! নূতন খেলা—মানুষ-পুতুল নিয়ে,—
প্রদীপ করে, পলক হারা, তাই কি আছিস্ চেয়ে ?
ঘুমায় শিশু, পল্লী ঘুমায়, ঘুমে জগৎ ছায়,
কাজল-কাল চোখের কোণে ঈষৎ হাসি ভায় !
হঠাৎ, কেন চোখ দু'টি তা'র, ছল্ছলিয়ে আসে,
ঘুমের ঘোরে, শিশুর চোখে, কোন্ দুখে জল ভাসে ?
ঝিনুক বাটার বান্ধানা কি নিদ্রা-ঘোরে ও শোনে ?
তাই কি কাঁপে ঠোঁট দু'টি তা'র—অশ্রু চোখের কোণে ?
ভয় যে আজো শেখেনিক' গান অপমান নাই,—
কি বেদনায়, ঘুমের ঘোরে, তা'র চোখে জল ভাই ?
শিশুর স্বপন—তা'ও কি নহে স্নেহের ভগবান ?
বিভীষিকার বিষম ছায়া তাতেও বিরাজমান ?

অপ্তব

খটের ধারে, বাতাসে দুন্দুল,
দেখেছিলাম একটি ছোট ফুল ;—
রবির আলোয় আহ্লাদে আকুল !

চটুল চোখে তারার মত চায় ;
হাত-লোভানো মন-ভুলানো তা'য়,
খটের ধারে ছুটেছিলাম, হায় ।

কত চড়াই, কত না উত্ৰাই,
তবুও তা'র নাগাল নাহি পাই,
ছিন্ন আঙুল, আকুল চোখে চাই ;
এই সে দেখি, যায় না দেখা তার,-
ওই সে পুনঃ, এমনি বারে বার,
এমনি ক'রে কাছে গেলাম তা'র ।

খাড়া পাহাড়,—ফাটলে তা'র ফুল,
শিলার ফাঁকে বাধিয়ে দে' আঙুল,—
বাড়াই বাহু—আবেগ সমাকুল ।

হঠাৎ—বায়ু বইল ঝুরুঝুরু,
হৃদয়তলে বিষম গুরুগুরু,
নিখিল যেন ছলছে ছুরুছুরু ।

গাছ দেখিনে, শুধু গাছের মূল,—
সাপের মত ঝুলিয়ে দে লাঙ্গল—
গিরির গায়ে ঘুমেই ঢুলুঢুল ।

শুইয়া পড়ি—ঝুঁকিয়া পড়ি ধীরে,
 পাইনে নাগাল,—রক্ত নামে শিরে,
 নিম্নে তিমির, শিলায় দেহ চিরে ।
 এবার বুঝি ঠেকলরে আঙুল !
 হঠাৎ—একি !—প'ড়ল খ'সে ফুল,—
 খটের তলে, বাতাসে ছলছল !

হৃদিনে অতিথি

সে দিন হঠাৎ বর্ষা পেয়ে,
 কামিনী ফুল ফুটল বনে ;
 আমি তাহার একটি গুচ্ছ
 তুলে নিলাম পুলক মনে ।
 ঘরে এসেই দোয়াত হ'তে,
 লুকিয়ে, ফেলে দিলাম কালি,
 দোয়াতের সে ফুলদানীতে
 ফুলটি রেখে দেখছি খালি ;
 জোর বাতাসে, হঠাৎ, ঘরে
 ঢুকল সে এক প্রজাপতি ;
 রইল রে সে সারাটি দিন,
 একলা ঘরের হ'য়ে সাথী ।
 অতিথ্ হ'ল আমার ঘরে,
 প্রজাপতি আপন হ'তেই ;
 ঝড় বাদলে, ছাড়তে তা'রে,
 পার্বনাত' কোন' মতেই ।

কবাট দিলাম বন্ধ ক'রে,
জানলা দিয়ে দিলাম তাই ;
সন্ধ্যা বেলায় প্রদীপ জ্বলে
ভাবছি ব'সে কত কথাই ।

হঠাৎ, উড়ে, আলোয় প'ড়ে,
প্রজাপতির জীবন গেল ;—
হায়, অতিথি ! নয়ন-জলে,
নয়ন আমার ভ'রে এল ।

হৃদ্বিনের সেই অতিথিরে,
হায়, স্মৃদিনের স্মপ্রভাতে,—
আমার স্নেহ—পাথের দিয়ে,
পেলাম নারে আর পাঠা'তে ।

আবার আমি তেগ্নি ক'রে,
অনল-দগ্ধ দেহটি তা'র,
রেখে দিলাম ফুলের 'পরে ;
এঁকে নিলাম বুকে আমার !

শ্রাবণ ১৩০৪ সাল ।

স্থলিত পল্লব

আহ্লাদে বনানী সাজে মুকুলে পল্লবে,

বসন্তের সারঙ্গের রবে !

নিবিড় শীতল ছায়,

রাখালেরা ঘুম যায়,

পাখী গায় মৃদু কলরবে ;

গাছে গাছে কিশলয়,

নূতনের গাহে জয়,

মৃত্যু জরা পাশরিয়া সবে ।

অকস্মাৎ ক্ষুণ্ণ করি' পল্লবের হৃদ,

ক্ষুণ্ণ করি' বসন্ত-সম্পদ,—

স্তব্ধ করি' কলরব,—

পল্লবের জীর্ণ শব

লভিলরে নির্বাণের পদ !

কে জানিত শোভা মাঝে,

মরণের পাংশু সাজে,

একজন পার হয় মরণের নদ ?

কাহারো হ'লনা, ক্ষতি, গেল সে লুকায়ে,

নিভূতে বৃন্তটি শুধু উঠিল শুকায়ে !

গোলাপ

পলে, পলে,—আলোকে, পুলকে,

ভরি' উঠে গোলাপ উষায় ;

স্ফুরিত পাপ্‌ড়ি, দিকে, দিকে,

কচি ঠোঁটে কি বলিতে চায় ?

রৌদ্রের সাগ্রহ আলিঙ্গনে,—

বায়ুর চুম্বনে, উষ্ণ স্বাসে,—

গন্ধ-ধারা সৃজিয়া কাননে,

কৌতুকী সে—হাসে, শুধু হাসে !

অলি আসে—মধু লয়ে যায়,

থাকে না সে কাজ সাক্ষ হ'লে,

গোলাপ সে মৃ'খানি ফিরায়,

শ্রান্তিভরে বৃত্তে পড়ে চ'লে ।

রক্তমুখী সন্ধ্যার গোলাপ,

ভাবে বুঝি লাবণ্য বাড়িছে :—

বিষ ঢালে দিনান্তের তাপ,

আর জীবনের আশা মিছে ।

নিশি আসে, শিশির নিষেকে—

শক্তি আর ফিরে নাক' তা'র,

শেষ গন্ধ ক্ষরে থেকে থেকে,

শেষ মধু,—নাহি নাহি আর ।

তার পর নিশান্ত বাতাসে,

দলগুলি ঝরি' পড়ে, হায়,

আলোকের তীব্র পরিহাসে,

ধূলি মাঝে গোলাপ লুটায় !

কুলাচার

বর এল সূতি-ধুতি-পরা,
গৃহে উঠে হাসির ফোয়ারা ;
‘শুনেছি বনেদী লোক,
তা’দেরো কি ছোট চোখ—
চেলী কভু দেখে নি কি তা’রা ?’
গৃহে উঠে হাসির ফোয়ারা ।

বাক্যপটু জেঠা মহাশয়,—
বর পক্ষে সম্বোধিয়া, কয়,
“সূতি-ধুতি ব্যবহার
এও নাকি কুলাচার ?
এমন ত’ দেখিনি কোথায় ।”
হাসি’ কয় জেঠা মহাশয় ।

বরের সে পিতামহ শূনি’,
(বর্ষীয়ান্ নিষ্ঠাবান্ তিনি)
কহেন, “বাপু হে শোন,
কাহিনী অতি পুরানো,
পিতৃমুখে শুনেছি এমনি,—
এসেছিল বৃদ্ধ এক মুনি ;—

এসেছিল সন্ন্যাসী প্রবীণ
বহুকাল আগে এক দিন ;

বেণু ও বীণা
সেদিন মোদের গৃহে,
বিবাহের সমারোহে,—
দীর্ঘ জটা, কম্বল মলিন,—
এসেছিল সন্ন্যাসী প্রবীণ ;—

দেহ গড়—উন্নত শিখর,
দস্ত শ্বেত, হাস্য মনোহর,
দক্ষ প্রায় 'ধুনী' যেন
দীপ্তিমান্ ছ'নয়ন,
দ্রুত পশে সভার ভিতর ;
স্তুতিত সকলে ঘোড়কর ।

কহিলা কাঁপায়ে সভাতল,
'শুভকাজে—এ কি অমঙ্গল ?
বিধান দিতেছি আমি,
কথা শোন গৃহস্থামী ;—
পুরোহিত ! কি দ্যাখো, অবাক !
দক্ষিণায় বসাব না ভাগ ।

চীনবাস পোড়াও সকল,
কার্পাস পরাও নিরমল,
ধনী পাদপের দান,—
কল্যাণ বরে শোভমান ;
বুধা শিরে ল'য়োনা এ পাপ,—
ক্রম-জীব হত্যার সম্ভাপ ।'

শেখর বাণ

মৌন সবে যেন মন্ত্র-বলে,
চীনবাস পোড়ায় অনলে ;
নিষ্পাপ কার্পাস বাস,
পুষ্প সম পুণ্য হাস,
কন্যা-বরে করিল প্রদান ;
অস্ত্রকান সন্ন্যাসী মহান !

সেই হ'তে বংশের গৌরব,
সেই হ'তে সম্পদ বিভব,
সে অবধি এ বিধান—
কুলাচারে অধিষ্ঠান,
সে অবধি সব স্তলক্ষণ,
পাপ প্রথা করিয়া বর্জন ।”

চমৎকৃত সভাগায়ে সবে—
সন্ন্যাসীর পুণ্যের প্রভাবে,
কন্যাপক্ষ তাড়াতাড়ি,
কন্যার রেশমী শাড়ী
ছাড়াইয়া, কার্পাসে সাজায় !
নবোৎসাহে নৌবৎ বাজায় !

ভিলক দান

স্নান সারি' সকাল সকাল,
মিঠায়ে ভরিয়া ছোট খাল,
আপনি চন্দন ঘসি',
চারি বছরের 'ঊষী'
ফোঁটা দিল, হাসি এক গাল ।

দিদি এল পিঠে ভিজ়ে চুল,
ঊষা-স্নানে শীতল আঙুল,
স্নেহের গোরবে তা'র,
মুখে শ্রী ধরে না আর,
মা বলিয়া মনে হয় ভুল !

কার্তিকের প্রভাত বাতাস
এখনো ছাড়িছে হিম-শ্বাস,—
চন্দন-পরশ, শিরে,
জাগায় সে ফিরে, ফিরে,—
জাগায় সে স্নেহের আভাস !

আছি মোরা দুয়ারে দাঁড়িয়ে,
পূর্ণ পথ—ছোট বড় ভায়ে ;
—আকুল তৃষিত চোখে,
মলিন—বয়সে শোকে,
মুখপানে কে গেল তাকায়ে ?

জড়সড়—শীতে করি' স্নান,
পরিধান—ধুতি পিরিহান,
শুভ্রকেশ—যত্নহীন,—
কোথা যাও হে প্রাচীন ?
তুমিও কি মোদেরি সমান ?—

বর্ষীয়সী ভগিনীর গৃহে,
চলেছ কি স্নেহের আগ্রহে ?
অথবা, অভ্যাস বশে,
অতীত মৃতের দেশে,
খুঁজিয়া ফিরিছ সেই স্নেহে ?

এস, এস, মোদের পুলক—
পুনঃ তোমা করিবে বালক !
সুখিত ললাটে তব—
মোরা দিব—মোরা দিব ;—
স্নেহদান—চন্দন-তিলক ।

শিশুর আশ্রয়

নদীর গড়ন শিশুটি ;

মা তাহার এক বেনিয়ার দাসী,
দিনে রাতে কাজ—নাই

শিশু—কাছে কাছে থাকে,
জল ঘাঁটে, কাদা মাখে,
ছুটে আসে শুনে মা'র স্বর ;—
কবে অবসর হবে,
কবে তা'রে কোলে নেবে,
পাবে ছেলে মায়ের আদর ।

ট'লে ট'লে চ'লে যায়,
মা'র মুখ পানে চায়,
ট'লে ট'লে কাছে আসে ফের ;
কাজে যেন ব্যস্ত কত,
হাত নাড়ে মা'র মত,
গিয়ে তা'র কাছেতে মুখের ।

মা তা'র উঠিবে যেই,
ছেলের আঙুল সেই,—
চোখে লাগে, দেখে অঙ্ককার ;
অমনি শিশুর পিঠে,
পড়ে চড় ছ'চারিটে,
কান্দে শিশু করি' হাহাকার ।

ভয়ে ধরে মা'রই কাছে গেল সে পাগল !
মার খেয়ে—আগে ভাগে পেলে শিশু কোল ।

হাসি-চেনা

ওরে দিদি, দেখি, দেখি,—একবার আয়,
ওই ছুট হাসি যেন দেখেছি কোথায় !

যে বুড়া হয়েছি আমি ভাই,

সব কথা ভুলে ভুলে যাই ।

ওই যে চতুর হাসি সরল প্রাণের,

ও যেন রে কর্তব্য মধুর গানের ;

হয়েছে,—ও হাসিটুকু, ভাই,

যা'র ছিল, সে-ও আর নাই ।

থাকিলে কি হ'ত বলা নয়ক' সহজ,

তো'তে আর তা'তে গোল বাধিতই রোজ ;

আর মনে তা'র ঠাই নাই,—

সে টুকু তোদেরি দি'ছি ভাই ।

অতীতের তরে শোক ?—আমার ত' নাই ;

যা'রা গেছে, আমি দেখি, তোরাও তা'রাই

ভুল হ'য়ে যায় সব ভাই,

বুড়া আমি—তাই ভুলে যাই !

কচি হ'য়ে ফিরে আসে আমাদেরি মুখ,

আমাদের যৌবনের যত ভুলচুক,

চলা ফেরা, সব—চেনা, ভাই,

চেয়ে, চেয়ে, দেখি শুধু তাই ।

যা'রা গেছে—কোথা হ'তে তা'দের সে হাসি-

প্রত্যহ নূতন মুখে ফুটে রাশি রাশি !

কৌতুকে রয়েছি ভাল, ভাই,

গাখ—আর বুড়া আমি নাই !

বর্ষায়ান্

নগরীর সঙ্কীর্ণ গলিতে—
পরিচ্ছন্ন পুরানো কুটীর ;
এক দিন সে পথে চলিতে
কুটীরেতে দেখিনু শ্ববির ।
আপন বলিতে, এ জগতে,
কেহ আর নাহি সে বুড়ার,
তাই, যা'রে পথে দেখে যেতে,—
ডেকে বলে, যত কথা তা'র ।

'টোটা'র বারতা শুনি' যবে,
দেশে দেশে অসংখ্য সিপাহী,—
কলহ করিয়া কলরবে,
দলে, দলে, হইল বিদ্রোহী ;—
অরাজক, হত্যা, অত্যাচার,
লুট্‌পাট, বীভৎস ব্যাপার ;—
সেই কালে বহু 'রোজগার'
ঘটেছিল অদৃষ্টে বুড়ার ।

দিন কত খুব ধূমধামে—
কাটে কাল, আমোদে হেলায়,
অটুহাসি যেথায় ত্রিঘামে,
সেথা হ'তে কমলা পলায় ।
তার পর ব্যবসা জুয়ায়,
সম্পত্তি বিস্তর গেল তা'র ;
মরে' গেল পুত্র দু'টি হায়,
পত্নী গেল—যুচিল সংসার ।

বেশু' ০ নী পা

“ঋণগ্রস্ত, রুদ্ধ, অসহায়,
পুত্রহীন, সম্পদ-বিহীন,
প্রতিবাসী---হেন দুর্দশায়, —
ফিরে নাহি দেখে একদিন ।
গঙ্গাস্নানে যদি কল্প যাই,—
রুগ্ন আমি, নটেমা প্রত্যহ,—
সম্মুখে না' পায়—লয তাই,
বলিবার নাহি মোর কেহ ,
বলিলে গারিঃঃ তা'সে সব,
নাহি তবু তা'দের প্রাণাণ .
চান হ'লে হাচ্ছি কি সে ক'ব
এমনি সৃজন প্রতিবাসী

বুড়া আমি মোর পদে এ • উপদ্রব”—
ক'লে রুদ্ধ, দাক্ষিণ্য-উদ্ধ নেত্র চাহি,” -
“ভগবান্ তুমি ইহা দাঁখলেছ সব,
চাহিয়া তোমার মুখ এও আমি সছি ।”
অত্যাচার, অন্যায়ে'র বারতা শুনিয়া,—
স্বাথপর দর্পিতের শূনি বিবরণ,—
বিশ্বাসী সে নিঃসহায় রুদ্ধেবে দেখিয়া, —
মনে হয়—আছ তুমি—আছ ভগবান্ ।

অরণ্যে বোদন

ঘেসেড়ানি চলে' গেছে জল খেতে নদে,
একা—মাঠে শিশু তার কাঁদিছে বসিয়া,
দ্বিপ্রহর—নিরজন,—ক্ষীণকণ্ঠ কাঁদে,—
অপরূপ শব্দ-মায়া বাতাসে সৃজিয়া !

কাছে আসে প্রজাপতি,—নেমে আসে সুর,
আবার বাড়িয়া উঠে ;—বাতাসের বেগে
পতঙ্গ পলায় যেই—দূর হ'তে দূর ;
বিশ্বে আজি—কান্না শুধু উঠে জেগে, জেগে !

হাতে এসে মনোজ্ঞ সে পতঙ্গ পলায়,
কান্না সে ত' চিরসার্থী—আছেই সমান,
বাড়ে কমে ?—সত্য বটে ; থামেনা রে হায়,
হায় রে একান্ত একা শিশুর পরাণ !

কখন থামিবে কান্না,—আসিবে জননী,
ফুরা'বে বিজন বাস—জুড়াবে পরাণী ।

দেবতার স্থান

ভিখারী ঘুমায়েছিল মন্দিরের ছায়ে ;
সহসা ভাঙিল ঘুম চীৎকার ধ্বনিতে,
জাগিয়া, চাহিয়া দেখে, পূজারী দাঁড়ায়ে,—
গালি পাড়ে, ক্রোধে যায় ধাইয়া মারিতে

বেপু ও বাপ

বিশ্বয়ে ভিখারী বলে, “গৌসাই ঠাকুর !
বুঝিতে না পারি মোরে কেন দাও গালি,
ভিক্ষা মেগে ফিরিয়াছি সারাটি দু’পুর,
শ্রান্ত বড়, তাই হেথা শুয়েছিনু খালি।”

রুঘিয়া পূজারী কহে, “চুপ্ বেটা চোর—
নীচ জাতি,—জাননা এ দেবতার ঠাই ?
মন্দিরের অভিমুখে পা’ রাখিয়া তোর
এটা হ’ল আরামের ঠাই ?—কি বালাই !”

সে বলে, “পা’ লয়ে তবে কোথা আমি যাই,
এ জগতে সকলি যে দেবতার ঠাই !”

মেঘের বারতা

নীল-মেঘপুঞ্জ হ’তে শৈত্যের বারতা
আসিছে, তাপার্ভ, ক্লিষ্ট ধরণীর ’পরে ;
আচম্বিতে জলে, স্থলে, কাননে, অন্ধরে,
বর্ষনে ধ্বনিয়া উঠে চর্চরিকা গাথা !

কাঁপে তরু, পুলকে আপ্নুত পুষ্পলতা ;
রুষ্টি-ধারা উঠে নাচি’ বায়ুর প্রহারে,
বাতাহত—বর্ষাহত—শ্যাম সরোবরে
স্ব-যৌবনা শ্যামাঙ্গীর লাবণ্য-গৌরতা !

কালোতে বিকাশে আলো, সৃণালে কমল,
 শ্যাম পত্র-পুটে ফুটে সোনার মঞ্জরী,
 তীর-বনচ্ছায়া-নীল, শ্যামল, কোমল,
 রুষ্টিপাতে—সরসীর বিকাশে মাধুরী ।

নীল মেঘ হ'তে আসে শান্তির বারতা,
 ধরায় লাবণ্য আনে অমরার কথা !

অপূর্ব সৃষ্টি

স্বধর্ম্মে স্থাপিলা যবে সৃষ্টির বিধাতা,
 (প্রতাপে তপনে যথা,) অদৃষ্ট আসিয়া
 নিভতে মদনে ডাকি' কছিল বারতা ;
 বাহিরিল চুপে চুপে ছ'জনে হাসিয়া ।

কুহেলি' সৃজিয়া তারা মাথায় তপনে,
 তপন হিমাংশু হ'ল ; হেথা পুনরায়
 নৈশ মেঘে চন্দ্র-ধনু রচিল গোপনে ;
 কেবা সূর্য্য—চন্দ্র কেবা—চেনা হ'ল দায়

শুধু তাই নয়, রৌদ্র সৃজিয়া শশীর,
 পৃথিমার শুরু মেঘে করিল স্থাপন ;
 বিরহে মিশায়ে দিল স্মৃতি পিরীতির,
 মিলনে কল্লিত ভেদ করিল রোপণ !

শাপ দিলা অন্তর্যামী অদৃষ্ট-মদনে,
 'প্রভু হ'য়ে হ'বে দাস মানব-সদনে ।'

‘বাতাসী-মা’র দেশ

ভুলোর মতন পাথার ভরে,
কোন ফুলের বীজ উড়েছে ?
কোন দেশেতে জনম লভি’
কোন বিজন গাঁয় ছুটেছে ?

ছেলেরা যেই ধরতে ধায়,
অমনি উঠে হাওয়ায় হায়,
কেউ বলে সে চাঁদের সূতো
জ্যোৎস্না-স্রোতেই লুটেছে ।

কেউ বলে ও ‘বাতাসী মা’র :—
কোন বিজন গাঁয় ছুটেছে ।

সবাই মিলে উঠলো ব’লে শেষ,
আমরা যা’ব বাতাসী মা’র দেশ ।

যেদেশে লোক স্বপন ভবে,
বাতাসে বীজ বপন করে,
বাতাসে হয় সোনা-ফসল,
সোনার চেয়ে দেখতে বেশ !

আজকে যোরা সেই দেশেতে যা’ব
আজকে যা’ব বাতাসী মা’র দেশ !

বেগু ও বাঁকা

তুলোর মতন লঘু পাখায়,
বায়ু ভরে বীজ উড়ে যায়,
হাওয়ার মাঝে বপন, রোপণ,
হাওয়ার মাঝে ফসল শেষ !

আজ্জকে মোরা সেই দেশেতে যা'ব,
আজ যা'ব রে বাতাসী মা'র দেশ !

জীর্ণ পূর্ণ

সূর্যের কিরণ করি' আড়,
দিব্য এক টগরের ঝাড় ;
আকাশে বাড়িয়া উঠে বেলা,
ছেলেরা ছাড়েনা তবু খেলা,
বুড়াদের ভাঙেনাক' জাড় ।

পথে যেতে পড়ে গেল চোখে,
টগরের পল্লবের ফাঁকে,—
কি এক সামগ্রা মনোলোভা,—
বিশ্ব ফল জিনি তা'র শোভা,—
রক্ত—যেন অপ্সরার স্বর্ণ অলঙ্কারে !

কাছে গিয়ে, দেখিনু যা' শেষে,
কৌতুকে একাই উঠি হেসে ;
সে নহে অমৃত-ফল, হায়,
জীর্ণ পাতা, রৌদ্রে স্বচ্ছ প্রায়,
জীর্ণ তবু পূর্ণ যেন রসে !

তা'র কাছে সরস পল্লব,
কান্তিহীন, দীপ্তিহীন, সব ;
এ জীর্ণ পল্লব মাঝে, আজ,
স্বস্থ, পুষ্ট, পত্রে দিয়া লাজ,—
বিকশিত সবিতার কিরণ-গৌরব !

অক্ষয়-বট

জন্ম তব সত্যযুগে হে, অক্ষয়-বট,
শাস্ত্রে কহে, সত্য কি ? কহ তা' মোরে তুমি
বড় সাধ মনে, যেতে তোমার নিকট,
ধন্য সে, চক্ষে যে হেরে তব পীঠ-ভূমি ।

ভাসিলা কি নারায়ণ তোমারি পল্লবে ?
পিও দিলা সীতাদেবী তোমারি সাক্ষাতে ?
সিদ্ধার্থ দেখিলা তোমা'—আর ভিক্ষু সবে ?
বিক্রম বেতালে লভে—সে কি ও শাখাতে ?

বল মোরে বিবরিয়া ছদ্মবেশ রাখি'
পূর্ব কথা,—সর্বতাপ যে কথায় ভুলায় ;
ভূত সাক্ষী তুমি শাখী ; কতই না পায়ী
যুগে যুগে শাখে তব বেঁধেছে কুলায় !

সময়-সাগর-জলে মগ্ন অতীতের
তুমি মাত্র চিহ্ন শাখী, পূর্ব ভারতের ।

শিশুহীন পুরী

সলিল-আলয়ে রাঙা শিখা ল'য়ে
আজিও রয়েছে কমল-কলি ;
এ হেন শিশিরে হায়, কা'র তরে,
জলে উঠে নিঃশব্দ অনল জ্বলি' ।

তাম্বুল রসে রাঙায়ে রসনা
সোনামুখী বন-জবার হাসি—
ফুটিল আবার বনে বনে ওই,
আজ কে দেখিবে তা'দের আসি' ?

কলায়ের স্ত'টে প্রজাপতি ফুটে,—
প্রজাপতি লুটে বেড়ায় খালি ;
নারিকেল শিরে বেজে ওঠে ধীরে
শত জোড়া ছোট হাতের তালি !

কাঠ-বিড়ালেরা মুখে মুখে করে
ঘুরনি ঘোরার হরষ-ধ্বনি ;
কাছিমেরা দেয় রোদে গা-ভাসান,
শালিকেরা ফেরে ফড়িং চুনি' ।

লাল নীল ক্ষুদে জাড়ে অঁাখি মুদে
হ'য়ে যায় হায় শুকায়ৈ সাদা,
ঘাটের ফটলে লুটায় চামর,
রাশি রাশি ফুটে সোনার গাঁদা ।

বনের কুহুমে আদর করিতে
 নাহি কেহ, নাহি শিশুর হাসি ;
 বনে, ফুলে, ফলে, ছায়া-তরু-তলে,
 শুধু বিফলতা বেড়ায় ভাসি' ।

বিজন এ পুরী শিশুর অভাবে
 কে যেন জীবন লয়েছে কাড়ি',
 হরষ বিথার নাহি যেন আর,
 পুলক-দেবতা গিয়াছে ছাড়ি' !

পথহারা

আকাশ পানে চেয়েছিলাম, ছিলাম করজোড়ে,
 একটা কিছু মনের মাঝে তুলেছিলাম গ'ড়ে ;
 আকাশ পানে চেয়েছিলাম,
 স্বাতীর জলে নেয়েছিলাম !

হর্ষে ছিলাম, হঠাৎ চোখে প'ড়ল ধূলা এসে,
 ছায়াপথটি হারিয়ে গেল,—অশ্রুজলে ভেসে ।

দেখি,—প্রথম পারিনিত' চাইতে কোনোমতে,—
 ছায়াপথটি হারিয়ে গেছে সাদা মেঘের স্রোতে ;
 আকুল হয়ে দিক্ ভুলেছি,
 বুকের মাঝে গোল তুলেছি,
 কে—ছায়াপথ চিনিয়ে দেবে, ছিনিয়ে ছায়া হ'তে
 পরাণ-পাণী—ফিরবে কিরে মেঘের রচা পথে ?

কে জ্যোতি-পথ দেখা'বে হয়, দিব্য-রথে ল'য়ে ?

ভেসে যাবে মেঘের ফেনা কোন্ সে বাতাস ব'য়ে ?

নীরব নিশি, ভাব'ছি একা,—

আজও কার' নাইক দেখা,

পরাণ-পাখী ফিরবে নাকি তারার রচা পথে ?

তোলাপাড়া এই শুধু, হয়, সে দিন সন্ধ্যা হ'তে ।

নাভাজীর স্বপ্ন

'ডোম' বলি', ফিরাইয়া মুখ, চলে' গেল পূজারি ব্রাহ্মণ,

নাভাজী নমিতেছিল গোবিন্দে তখন ;

দু'টি ফোঁটা অশ্রুজলে, মন্দির সোপান,

সিক্ত হ'ল ; সে দিন সে আর, পথে যেতে গাহিল না গান ।

কাটা বেত, চেরা—কাঁচা বাঁশ, কুটীর দুয়ারে স্তূপাকার,—

অন্যদিন পরিতৃপ্ত হ'ত গন্ধে যা'র,

আজ তা'রে কোনো মতে পারিল না আর

বাঁধিবারে ; দেখিল না চেয়ে আপন হাতের দ্রব্য-ভার ।

কুটীরের রুদ্ধ করি' দ্বার, ভূমিতলে রচিল শয়ান,

রাঁধিলনা, খাইলনা, করিলনা স্নান ;

ধীরে—তন্দ্রা এল চোখে, মগ্ন হ'ল মন ;

দেখিল সে অপূর্ব স্বপন,—ইষ্টদেব শিয়রে আপন !

“হে নাভাজী ! ক্ষুণ্ণ কেন মন ?” জিজ্ঞাসিলা গোবিন্দ তখন,

“কর বৎস হরিদাস কবীরে স্মরণ,

সে সব ভক্তের কথা করহ প্রচার,

ব্রাহ্মণের দর্প হবে দূর,—স্বণা কা'রে করিবেনা আর ।”

‘রম্যাণি বীজ্য’

ফাগুন নিশি, গগন-ভরা তারা,
তারার বনে নয়ন দিশাহারা ;

কে জানে আজ কোন্ স্বপনে
উঠেছে চাঁদ আনু গগনে,
তারার গায়ে চাঁদের হাওয়া লেগেছে !
পেয়েছে সব চাঁদের যেন ধারা !

আনু গগনের চাঁদ,
যেন হেথায় পাতে ফাঁদ ;
আর নিশীথের আলো—
আজ হেথায় কিসে এল ?
আরেক সঁঝোর গান,
ফিরে জাগায় যেন তান ;
তারার বনে পরাণ হ’ল সারা !

তবু
তবু
এ যেন নয় গান,
এ যেন নয় আলো,
দোলায় কেন প্রাণ,
কেমন লাগে ভাল,—
মন যে মগন তা’তে,
ফাগুন-মধু-রাতে,
মন চিনেছে আকাশ-ভরা তারা,—
পেয়েছে আজ চাঁদের ঘাঁরা ধারা !

দেয়
বিচিত্র ওই আকাশ
নূতন কত আভাস,
উষার আলো বাতাস—

বে গু ও বী গা :

ভুমি নিরাশার মেঘে ডুবোনা,
ভুমি প্রলয়ের ঝড়ে নিবোনা,
শুধু অমনি আসিয়া,
 হাসিয়া, হাসিয়া,
 অমিয় ঢালিয়ো পরাণে ;
গম জীবন-সন্ধ্যা-গগনে !

জ্যৈষ্ঠ, ১৩০৬ শাগ ।

অমৃত-কণ্ঠ

শুনেছি, শুনেছি কণ্ঠ তব,
পুনঃ, আজি বহুদিন পরে,
প্রাণে মনে জেগেছে উৎসব,
রোগাঞ্চ সকল কলেবরে !
উৎকর্ণ, উদ্‌গীব হ'য়ে আছি, আবার শুনিতে ওই স্বরে !
নিশান্তের শুকতারা সম
পরিপূর্ণ লাবণ্যের রসে,
সঙ্গীত তোমার, নিরুপম !
হর্ষ-ধারা অন্তরে বরষে ;
দিবসে কোথায় ডুবে যায়, অতি ক্ষীণ, অতি মূঢ় যে সে ।
পূর্ণ, পুষ্ট মন্দার মুকুল,—
নন্দনের লতাচ্যুত হ'য়ে,
তোমার ও সঙ্গীতে আকুল,—
অঙ্গে মোর পড়িল লুটায়,
প্রথম পাপড়ি যে সময়ে, এলায়ে পড়িবে মধুবায়ে ।

ও সঙ্গীত আঙুরের ফল,
মুহুরায় রসের ব্যথায়,
অধরের পীড়নে কোমল
ভেঙে পড়ে, একটি কথায় ;

বিন্দু—ছুই, স্নিগ্ধ, সুমধুর রস দিয়া—মিলায় কোথায় ।

বর্নগাশ্বে মুক্তাকল সম,—
পল্লবাগ্রে যাহা শোভা পায়,—
সন্ধ্যাসূর্য্য,— বাহে অনুপম
সম্প্র বর্ণে—লীলায় সাজায়,—

সে যেন গো তোমার সঙ্গীতে, লয় দিয়া মনিলে মিলায় ।

স্বাতী হ'তে বরি' যে শিশির
মহাগনি হয় সিন্ধুতলে,
তুলনা সে—আজি এ শিশির
অন্ধকারে যে সুর উথলে ;—

আনন্দ-চঞ্চল করি' গোরে, আকুল করিয়া তারাদলে ।

জননীর চুম্বনের মত
'ও সু-স্বর, পবিত্র, কোমল,—
মল্লপূত আশীর্ব্বাণী-সুত,
হর্ষ-স্নিগ্ধ যেন শান্তিজল ;

সঙ্গ-বারা শেফালি পরশে, হ'ল যেন শরীর শীতল ।

নক্ষত্র জানিত যদি গান,
ভাবিতাম গাহিতেছে তা'রা ;
বাণীর বীণার মধু তান !
অমরার—অমৃতের ধারা !

তারার পরশ বুঝি পাও,—তাই গাও হ'য়ে আত্মহারা !

অঁখি কভু দেখেনি তোমায়,
হে অনন্ত-আকাশ-বিহারী !
ফের' তুমি তারায়, তারায়,—
নক্ষত্রের কূলে কূলে, মরি,
পক্ষ্ম যেন অঁখির পলকে,—অঁখির পলকে যাও মরি' ।

বড় সাধ, শিশুকাল হ'তে,
হে স্নকণ্ঠ ! চিনিতে তোমায় ;
পাইনি সন্ধান কোনো মতে,
পাইনি তোমার পরিচয় ;
কত জনে স্খায়েছি নাম,—বলিতে পারে না কেহ, হায় ।

স্খায়েছি কবিজন পাশে,
স্খায়েছি কৃষক-বধূরে ;
কেহ শুনি' অন্তরালে হাসে,
কেহ হায় চলে' যায় দূরে ;
কোন দেশে জনম তোমার ? কি বা নাম—কে বলিবে মোরে ?

নাম তব থাকে, নাহি থাকে,
ডাকিব 'অমৃতকণ্ঠ' ব'লে ;
ভালবেসে যে যা' ব'লে ডাকে,
তাহাতেই পরাণ উথলে ;
হে অমৃতকণ্ঠ ! পাখী মোর, তোর গানে চক্ষু ভরে জলে ।

গান—তব শোনে বহু জনে,
না থাকে বা থাকে পরিচয় ;

শুনেছি হে, ওই গান শুনে,
 গর্ভশায়ী শিশু স্তব্ধ রয় ;
 যতদিন নাহি এস ফিরে, ততদিন ভূমিষ্ঠ না হয় ।

গাও, তবে, গাওহে আবার,
 হর্ষ-শিশু লভিবে জনম !
 সুধাপায়ী ! চন্দ্রিকা উদগার
 কর পুনঃ স্নিগ্ধ মনোরম ;
 কোকিল পাপিয়া চাতকেরা স্তব্ধ হ'ল, গাও নিরুপম ।

যাহা কিছু মনোজ্ঞ-মধুর,
 যাহা কিছু পবিত্র-সুন্দর,
 যত আছে ঈপ্সিত-সুদূর,
 —চির মুগ্ধ আমার অন্তর—
 বলে', পাখী শীর্ষে সবাকার—হরষ-আপ্নত ওই স্বর ।

বহুদিন, বহুদিন পরে,
 পাখী—তোর পেয়েছি রে সাড়া !
 বহুদিন, বহুদিন পরে,
 প্রাণ মোর পেয়েছে রে ছাড়া !
 সাড়া দেছে অন্তরের বীণা, গানের স্পন্দনে পেয়ে নাড়া !

আজ, পাখী, সাধ হয় ফিরে,
 ফিরিবারে তারায়, তারায় ;—
 ব্যগ্র চোখে, সমুন্নত শিরে,
 ছেড়ে যেতে পুরানো ধরায় ;—
 বাঁশীর একটি রক্ত খুলি', নিঃশেষিতে সঙ্গিতে ছরায় ।

তার পর, নৈশ অন্ধকারে,
 তোর মত যা'ব মিলাইয়া ;
 কাজ নাই আনন্দ বন্ধারে,
 চলে যা'ব শুধিরে গাহিয়া ;
 বাহা গাই,—তোর মত যেন, নেতে পারি পুলক ঢালিয়া

তার পর, কে চিনে না চিনে,
 রাগিবনা সন্ধান তাহার ;
 কণ্ঠ যদি পূর্ণ হয় গানে
 তোর মত, গাহিব আবার ;
 বৈশিষ্ট্য রহিব না আগি, গান শেষে রহিব না আর ।

হে অমৃতকণ্ঠ ! হে সুদূর !
 মূর্তিমান্ সুর ! সুধাধার !
 কণ্ঠ মোর করছে মধুর,
 কর মোরে সঙ্গী আপনার,
 গান গেয়ে, উল্লাসে উড়িয়া, দিব মোরা অসীমে সাতার
 বেদনার বন্ধনের পারে,
 চল, পাখী, লইয়া আশ্রয় ;—
 কল্ট,—যেথা, ফিরে না শিকারে,
 সব ব্যথা সঙ্গীতে ফুরায় ;
 বাঁশার একটি রন্ধু খুলি—সব গান শেষ হ'য়ে যায় ।

কর মোরে, অতুল-সুন্দর !
 পরিপূর্ণ সঙ্গীতের রসে ;
 এই মহা তমিস্র-সাগর
 আসে যেন সঙ্গীতের বশে ;
 তারার জনম দিয়া গানে, দীপ্ত কর এ বিজন দেশে ।

অন্ধকারে, পথভ্রান্ত জন

পায় যেন সঙ্গীতে আশ্বাস ;—

যুচে যেন প্রাণের ক্রন্দন,

ফেলিতে না হয় দীর্ঘশ্বাস,—

অন্ধকারে পায় দেখিবারে—জ্যোতির্ময় আপন নিবাস !

মুক্তি-শিশু— জন্মেনি এখন'

আছে কোন্ গানের প্রত্যাশে !

পাখী ! পাখী ! তোমার মতন

গান গোরে শিখাও হে এসে !

মুক্তি-শিশু আসুক জগতে,—পূর্ণ হ'ক ত্রিলোক হরষে !

নামহান

বর্ষাশেষ, স্তপ্রভাত প্রসন্ন আকাশ,—

সহাদৃত্তি ইন্দ্রনীল মণির মতন ;

জলে, স্থলে, ফুলে, ফলে, লাবণ্য-বিকাশ,

পথ, ঘাট, সব—যেন সবুজে মগন ।

পুরানো প্রাচীর খানি সবুজে সবুজ !

আর তা'রে কে বলে কঙ্কাল-সার আজ ?

দেখ্‌রে নিন্দুক তোরা দেখ্‌রে অবুঝ,

লাবণ্যের বন্যা—মর্ত্যে—নন্দনের সাজ !

সেই যে ভাবী পা
অতি ছোট ছোট গাছ—ছেয়েছে খাটীর,
নেচে উঠে স-পল্লব আকুল উল্লাসে,
রৌদ্র-ঝিলে করে স্নান, নত করি' শির,
পাখী সম ;—বিচঞ্চল মূহুর বাতাসে ।

বল্ ওরে ছোট গাছ তোদের সুধাই,
নাম কি রে—নাম কি রে—নাম কি তোদের ?
“নাম নাই, আমাদের নাম নাই, ভাই,
হর্ষে আছি,—হর্ষ দি'ছি—এই,—এই চের !”

মমতা ও ক্ষমতা

পক্ষি-শাবকেরে বটে সেই স্নেহ করে,—
দৃঢ় মূষ্টি-বলে ঘা'র কাল ফণী মরে ;
নহিলে রথ্যা সে স্নেহ,—শুধু মনস্তাপ ;—
মমতা—ক্ষমতা বিনা, উন্মাদ প্রলাপ ।

আকাশ-প্রদীপ

অন্ধকারে জ্বলে ক্ষীণ আকাশ-প্রদীপ,
কতক্ষণ—আছে আয়ু—কতক্ষণ আর ?
হিম-সিকু মাঝে রচি' ক্ষুদ্র মায়া-দ্বীপ,
সে কেবল রশ্মিটুকু করিল বিস্তার !

শাহারজাদী

কল্পনা-নগরে, শত কবিতা সুন্দরী,
আনন্দে করিত বাস ; সহসা একদা,
কহিলেন লোকেশ্বর, তূর্য্যধ্বনি করি'
“সেই আমি নিত্য নব অনিন্দ্য প্রমদা ।”

আনন্দে লাগিল দিতে যত পুরবাসী
কন্যা নিজ ; কে জানিত দিনেকের তরে
সে সম্পর্ক ? পোহাইলে বিবাহের নিশি,
কে জানিত, যা'বে তা'রা স্বপনের পুরে !

ভয়ে নাহি আর কেহ করে কন্যাদান
লোকেশ্বরে ; পরিণাম জেনেছে সকলে ;
ফিরিয়া এসেছি তাই ভবনে আপন,
মানসী কন্যারে মোর কহি' অশ্রুজলে ;—

মা' রে বাছা ! লোকেশ্বর কণ্ঠে দেহ' মালা
শাহারজাদীর ভাগ্য লভ' তুগি বালা !

সমাপ্ত

কবি-পরিচয়

কবি সত্যেন্দ্রনাথ দত্ত, বাংলা ১২৮৮ সালের ৩০শে মাঘ, শনিবার কলিকাতার সম্মিষ্ঠিত নিম্ভা গ্রামে তাঁহার মাতুলালয়ে জন্মগ্রহণ করেন ; এবং তিনি বাংলা ১৩২৯ সালের ১০ই আষাঢ় শনিবার কলিকাতার রাত্রি দু'টায়, চল্লিশ বৎসর পাঁচ মাস বয়সে ত্রৈলোক্য পরিত্যাগ করেন । তাঁহার পিতার নাম রজনীনাথ, মাতা মহামায়া দেবী । কবির পিতামহ সুপ্রসিদ্ধ সাহিত্যিক ও জ্ঞান-তপস্বী অক্ষয়কুমার দত্ত মহাশয় । কবি তাঁহার পিতামহের নিকট হইতে অসাধারণ জ্ঞান-পিপাসা এবং সাহিত্যের রসজ্ঞতা ও সাহিত্য-সৃষ্টির ক্ষমতা লাভ করিয়া অল্প বয়সেই প্রসিদ্ধ কবি বলিয়া বিখ্যাত হইয়াছিলেন । তিনি বাল্যাবধি বিদ্যালয়গামী ও কবিতা-প্রিয় ছিলেন । তাঁহার মাতুল শ্রীযুক্ত কালীচরণ মিন মহাশয়ের দ্বারা সম্পাদিত তৎকালীন প্রসিদ্ধ সাপ্তাহিক 'ভিত্তমী' নামক পত্রিকায় কবি সত্যেন্দ্রনাথের কবিতা প্রথম ছাপা হয় । 'সবিতা' তাঁহার প্রথম কবিতা-পুস্তক । ইংরেজী ১৯০৫ সালে স্বদেশী আন্দোলনের সময়ে 'সন্ধিক্ষণ' নামে তিনি একটি স্বদেশ-প্রেম-মূলক কবিতা-পুস্তিকা প্রকাশ করেন । তৎপরে 'বেণু ও বীণা', 'হোমশিখা', 'তীর্থ-সলিল', 'তীর্থরেণু', 'ফুলের ফসল', 'জন্মভূমি', 'কুহ ও কেকা', 'রঙ্গমল্লী', 'তুলির লিখন', 'মনিমঞ্জুরা', 'অন্ন-আবীর', 'হৃদয়িকা', 'চীনের ধূপ' পর্যায়ক্রমে প্রায় প্রতি বৎসরে একখানি করিয়া গ্রন্থ তিনি প্রকাশ করেন । তাঁহার মৃত্যুর পরে নানা পত্রিকায় প্রকাশিত অনেকগুলি কবিতা সংগ্রহ করিয়া 'বেলাশেষের গান', 'বিদায়-আরতী', 'স্বপ্নের ধোঁয়া', 'কাব্য-সঞ্চয়ন' এবং 'শিশু-কবিতা' প্রকাশিত হয় । গল্প ও পড়া বড় রচনা এখনও সাময়িক পাত্রে বিক্ষিপ্ত বহিয়াছে ।

সত্যেন্দ্রনাথের প্রকৃতি মধুর ও নীরব ছিল। তিনি অল্পভাবী, জিতেন্দ্রিয়, সত্যসন্ধ, স্বদেশপ্রেমী ও সমাজসংস্কারের পক্ষপাতী ছিলেন। তাঁহার দানশীলতা ও মাতৃভক্তি, কবিশুভক রবীন্দ্রনাথের প্রতি ভক্তি ও শ্রদ্ধা এবং বন্ধুবৎসলতা অসাধারণ ছিল।

সত্যেন্দ্রনাথ নানা ভাষায় অভিজ্ঞ এবং নানা বিজ্ঞায় পণ্ডিত ছিলেন। তাঁহার রচনার মধ্যে ভাষার কারুচূপি-ও নানা বিজ্ঞার পরিচয় যথেষ্ট পাওয়া যায়। ইতিহাসের ও পুরাণের খুঁটিনাটি তথা তাঁহার গ্রন্থ জ্ঞান ছিল যে তিনি অবনীলাকমে তাঁহার রচনার মধ্যে নানা প্রসঙ্গের উল্লেখ ও আভাস গাথিত কবিতা দিতে পারিতেন।

আর সত্যেন্দ্রনাথ ছিলেন চন্দ-সরস্বতী, নানাবিধ ছন্দ-রচনায় ও উদ্ভাবনে তিনি অপ্রতিদ্বন্দী ছিলেন।

সত্যেন্দ্রনাথের সাহিত্য-সেবায় একটি নির্ভীক সত্যনিষ্ঠা ছিল। সেই সত্যের অনুরোধে তিনি স্পষ্টবাদী বীর ছিলেন। তাঁহার আদর্শ ছিল বাস্তব ও বিজ্ঞান-সম্মত—সেই আদর্শকে তিনি তাঁহার কবি-হৃদয়ের সূক্ষ্ম অনুভূতি দ্বারা ভাষায় ও ছন্দে সুপ্রতিষ্ঠিত করিয়া ছিলেন। অতি উচ্চ সূক্ষ্ম কল্পনা অথবা অবাস্তব সৌন্দর্যের মোহে তিনি এই বাস্তব হইতে কখনো দূরে সরিয়া যান নাই। তিনি তাঁহার চন্দ-সরস্বতীকে মানবের বাস্তব ইতিহাসের সর্বাঙ্গীন প্রগতির অধিষ্ঠাত্রী দেবতারূপে বন্দনা করিয়াছেন।

সত্যেন্দ্রনাথের সাহিত্য-প্রেরণার আর-একটি দৃঢ় সম্বল ছিল—মাতৃভাষার প্রতি অসীম প্রগাঢ় অনুরাগ। প্রাচীন বাংলা-সাহিত্য ও প্রচলিত ভাষা হইতে আশ্চর্য্য অধ্যবসায়ের সহিত তিনি খাঁটি বাংলা বুলিকে উদ্ধার করিয়া তাহাকে তাঁহার রচনার মধ্যে দিয়া পুনঃপ্রতিষ্ঠিত করিতে চাহিয়াছিলেন। তিনি সেই বাংলাদেশের নিজস্ব বাগ্‌ধারাকে ও সেই ভাষার ধ্বনিকে অফুরন্ত ছন্দ-রচনারে ঝাঁজাইয়া তুলিয়া নতন ছন্দ-বিজ্ঞান সৃষ্টি করিয়া গিয়াছেন। এই ভাষা ও ছন্দের সৃষ্টিই তাঁহার কবি-প্রতিভার সর্বাপেক্ষা মৌলিক কীর্তি। খাঁটি বাংলা ভাষা ও সেই ভাষার ছন্দকে উদ্ধার করিয়া তাহাদের সমৃদ্ধ কবিতা হোলাই যেন তাঁহার জীবনের ব্রত ছিল।

স্বদেশের প্রতি তাঁহার অসীম মমতা ছিল। বর্তমানের যাঁহা কিছু অধর্ম ও অসত্য, যাঁহা কিছু ভীকতা ও জড়তা, যাঁহা কিছু ক্ষুদ্রতা ও মূঢ়তা ছিল তাঁহাকেই কঠিন বিক্কার দিতে ও বিক্রম করিতে গিয়া তাঁহার বাণী বেদনার জ্বালায় বিষাক্ত হইয়া উঠিত আবার অতীত ও বর্তমানে যাঁহা কিছু মহান্ ও সুন্দর, তাঁহাতে যাঁহা কিছু মহান্ ও সুন্দর হইবার সম্ভাবনা দেখিতেন, তাঁহাই তাঁহার মর্ম্মস্পর্শ কবিত, এবং তাঁহার বন্দনা-গানে তিনি আশুভাষা হইয়া পড়িতেন।

কবি সত্যোক্তনাথের স্বদেশের প্রতি দরদ এত প্রবল ও তীক্ষ্ণ ছিল যে তিনি পৌরাণিক ও ঐতিহাসিক কাহিনীর অনুরালে এমন কি প্রাকৃতিক দৃশ্য বর্ণনা উপলক্ষ্য করিয়াও দেশের অবস্থা দুঃখ দুর্দশা এবং আশা আকাঙ্ক্ষা প্রভৃতি প্রকাশ করিবার সুযোগ পাইলে ছাড়িতেন না এবং এই প্রকার রচনায় তাঁহার একটি বিশেষ অনন্য-সাধারণ নিপুণতা ছিল। এইরূপে তিনি বহু কবিতা রচনা করিয়া গিয়াছেন যাঁহাদের অনুরালে কবির হৃদয়-বেদনা অথবা আনন্দ ও আশা প্রচ্ছন্ন হইয়া রহিয়াছে। দরদী সন্ধানী পাঠক-পাঠিকা একটু অনুধাবন করিলে তাঁহার পরিচয় পাইবেন।

এমন কবির অকাল তিরোপানে বঙ্গসাহিত্যের যে অপরিমেয় ক্ষতি হইয়াছে তাঁহা কবি কীটসের অকাল নিয়োগের কৃপা তিরকাল কাব্য-বসিকদের দীর্ঘনিশ্বাস আকর্ষণ করিলে।

কবি সত্যেন্দ্রনাথের রচনা

পুস্তকের নাম	.	প্রথম প্রকাশিত
বেণু ও বীণা (কাব্য)	...	১৩১৩ সাল
হোমশিখা	..	১৩১৪ "
তীর্থসলিল	...	১৩১৫ "
তীর্থরেণু	..	১৩১৭ "
ফুলের ফসল	...	১৩১৮ "
জন্মদুঃখী (উপন্যাস)	..	
কুহু ও কেকা (কাব্য)	...	১৩১৯ "
রক্তমল্লী (নাট্যকাব্য)	...	১৩১৯ "
তুলির লিখন (কাব্য)	...	১৩২১ "
মণি-মঞ্জুষা	..	১৩২২ "
অত্র-আবীর	...	১৩২২ "
হাসন্তিকা	...	১৩২৩ "
চীনের ধূপ	..	
বেলাশেষের গান (কাব্য)	..	১৩৩০ "
বিদায় আরতি	...	১৩৩০ "
ডঙ্কানিশান (উপন্যাস) 'প্রবাসী'তে প্রকাশিত আষাঢ় ১৩৩০	..	১৩৩০ "
ধূপের ধোঁয়ায় (নাটিকা)	...	১৩৩৬ "
কাব্য-সঞ্চয়ন (কাব্য)	...	
শিশু-কবিতা	...	১৩৪২ "

